


*“Lusekelo”*

*Mafunjisho afuma*

*mu buku wa*

# **MATEO**



**“Nanchi sambilai kukebesha bufumu  
bwanji, ne bololoke bwanji; ne bino bintu  
byonse bikemubikilwapo.” —Mateo 6:33**

## BYA KUTENDEKA

Uno buku wa kufunda Mateo wanembwa na muntu yense uji na kizaku kya kumvwa Mambo Awama. Kafwako jiwi jikatampe jikwabo jakila ja kwibabujilamo ba panopan-tanda ne.

Twaketekela namba bantu mu ntanda yonse bakonsha ku-mona bukwasho mu kano kabuku mu kumvwisha byambo bya Lesa bulongo, kabiji amba bavula bakakeba Yesu Kilishitu kwikalala ke Mupulushi wabo wa kwibapulusha ku mambo abo umvwe bakyangye kwikyuba ne. Kano kabuku kakekale ke ka kutundaika waitabila yense kwikalala bwikalalo bwawama bwa mwina Kilishitu ne kwipana kwi aye Lesa pa juba pa juba amba amutokeshe Nkambo Yesu Kilishitu pa muchima. Aye waishile mu kwitupa bumi bwa myaka!

---

Copyright © 2005, by Mrs. Rose A. Goodman, Author

---

“LUSEKELO,” buku wa kufunda **Mateo**, bamupulinta ke kintu kya Iwitabilo ku:

WORLD MISSIONARY PRESS, INC.  
P.O. Box 120  
New Paris, Indiana 46553-0120 USA

---

---

Uno buku wa Mateo ye buku wapanwa kwa kubula mali. Yukai amba kechi ye wa kupana ku jibumba jikatampe ne. Wafwainwa kwingijishiwa mu bipanyi bicheche bya kufunda Buku Wa Lesa, nangwa mu kufunda bunke bwenu, nangwa na baitabila katataka.

# KIBABA 1. KUSEMWA KWA YESU KILISHITU, MUPULUSHI WETU



Mateo 1:18-35

<sup>18</sup>Kabiji kusemwa kwa Yesu Kilishitu kwajinga byonkabye: Inanji Maliya byo bamwipwizhe kwi Yosefwa, po bakiji bakyangye kwilajika, bamumwene kasa aimita jimi ja ku Mupashi Wazhilá. <sup>19</sup>Kabiji Yosefwa mwata wanji, byo aji waoloká, kechi waswile kumulengesha bumvu ku meso a bonse ne, wafukwile’mba, Nkamukaine ku mbaji. <sup>20</sup>Kabiji byo akilangulu-kilenga byobyo, ponkapo, malaika wa Nkambo wamwekele mu kiloto amba, Obewa Yosefwa, mwana Davida, kuchina kumulajika mukazhobe Maliya ne:

mambo awa ye aimita munda mwanji ye wa kwa Mupashi Wazhilá. <sup>21</sup>Kabiji aye ukasema mwana wa mulume; ne obewa ukamutumba jizhina janji amba YESU; mambo aye yenka ukebapulusha bantu banji ku mambo abo. <sup>22</sup>Kabiji bino byonse byamwekele’mba, kifike akya kyo aambile Nkambo mu ngauzhi wanji, amba, <sup>23</sup>Talai! muzhike wa kishinka wabulá kusambakanapo na mwanamulume ukemita jimi, ukasema mwana wa mulume, Kabiji bakamutumba jizhina janji amba Emanuele (pa kulumbulula, ko kuba’mba, Lesa tuji nanji). <sup>24</sup>Kabiji pa kubuka mu tulo, Yosefwa waubile monka mo amulayile malaika wa Nkambo, ne kumulajika wamulajikile mukazhanji; <sup>25</sup>pakuba kechi wasambakene nanji ne poso byo asemene mwana: kabiji wamutumbile jizhina amba YESU.

BYA KUBA

A. Ku mpelo ya mepuzho onse musakutana mpunzha ya kuenomba mukumbu wenu. Inge mwakankalwa kukumbula jipuzho, tangai kibaba jibiji. Mikumbu yonse yatanwa mu kibaba.

1. Jizhina ja inanji Yesu jo ji ka? \_\_\_\_\_
2. Yesu waimichilwe ku \_\_\_\_\_

Kino kitumwesha'mba Lesa ye Shanja Yesu mambo Mupashi Wazhila ne Lesa ye umo.

3. Ye ňanyi wamwekele kwi Yosefwa mu kiloto ne kumubula'mba, "Kuchina kumulajika mukazhobe Maliya ne: mambo aye ye aimita munda mwanji ye wa kwa Mupashi Wazhilá?"

4. Jizhina jikwabo ja kwa Yesu japanwa. Jo ji ka? \_\_\_\_\_

5. Jizhina ja Emanuele pa kulumbulula ko kuba'mba ka?  
(byambo bisatu)

B. Labijilai uno veleshi:

**"...ne obewa ukamutumba jizhina janji amba YESU; mambo aye yenka ukebapulusha bantu banji ku mambo abo."**

-Mateo 1:21

## YESU BYO AKONSHA KWITUPULUSHA NA BUBI

Yesu kechi wajinga na shanji wa panopantanda ne. Mupashi Wazhila ye Shanji. O ene mambo mashi anji o aji a bulesa kabiji o ene mambo o akonshesheshe kufwa pa musalabu na mambo a bubi bwetu. Yesu wajingga kitapisho kyalumbuluka kya bubi mambo kechi walengele mambo ne. Yesu ye watoka ne kuzhila. Yesu waishile panopantanda mu kwitupulusha ku mambo etu. O ene mambo o twakonshesha kwita Yesu ke Mupulushi wetu. Waishile mu kwitupulusha.



**YESU YE LESA –  
WAISHILE MU BUMUNTU**

## KIBABA 2. BA MANA BAIYA MU KUMONA YESU



Mateo 2:1-23

<sup>1</sup>Kabiji Yesu, byo asemenwe mu Betelema wa mu Yudea mu myaka ya Heloda mfumu, pon-kapo, ba mana ba ku musela basolomokele ku Yelusalema'mba, <sup>2</sup>Lelo uji pi wasemwá Mfumu wa Bayudea? mambo kabangabanga kanji twikamwene ku musela, kyo twaishila kumupo-pwela. <sup>3</sup>Ne Heloda mfumu pa kumvwa, waubile kijikila, ne bonse ba mu Yelusalema pamo. <sup>4</sup>Kabiji pa kwibakonkanya bañanga bakatampe ne banembeshi ba bantu, wibepwizhe'mba, Ku-kasemwa Kilishitu kwe? <sup>5</sup>Kumvwa abo bamwambile'mba, Mu Betelema wa mu Yudea; mambo byonka byo banembele ku ngauzhi wa Lesa amba, <sup>6</sup>Kabiji obe-

wa Betelema wa mu kyalo kya Yuda, kechi wi mucheche wa mu bilolo bya mu Yuda ne: mambo monka mobe mukafuma mfumu, ye ukekála kafunga wa bantu bami bena Isalala. <sup>7</sup>Ponkapo Heloda wibechile ku mbaji aba ba mana, ne kumvwa waumvwine juba jine jo kamwekelemo kabangabanga. <sup>8</sup>Kepo ebatumine ku Betelema, amba, Yainga, kamukebeshai bulongo ao mwana; kabiji pa kumutana, mubwele, mumbule, ne amiwa namiwa nkayeko, nkamupopwele. <sup>9</sup>Ne abo, pa kumumvwa mfumu, ke baye ne kuya; kabiji ne aka kabangabanga, ko bamwene ku musela, ke kebatangi-jileko, poso byo kafikile pají mwana, kaimene peulu. <sup>10</sup>Ponkapo pa kwikamona kabanga-



banga, basekele na lusekelo lukatampe lwine. <sup>11</sup>Kabiji pa kutwela mu nzubo bamwene mwana sa aji ne inanji Maliya; ke bamulambilé ne kumulambilá pansi ne kumupopwela; ponkapo basolwele nsabo yabo ne kumupa bya bupetu, bya nglode ne libona ne mola. <sup>12</sup>Kabiji byo bebajimwine kwi Lesa mu kiloto amba, Inge mubwele kwi Heloda ne, babwelele kwabo mu jishinda jikwabo. <sup>13</sup>Kabiji byo bafumineko, ponkapo malaika wa Nkambo wamwekele kwi Yosefwa mu kiloto, amba, Buka, utwale mwana ne inanji, unyemene mu Ijipita, ukekale monka poso nkakubule; mambo Heloda ukasaka kumukeba mwana amba, Namwipaye. <sup>14</sup>Kabiji byo abukile waimene bufuku, wasendelete mwana ne inanji, ke baye ne kuya mu Ijipita; <sup>15</sup>swaikelen-ga monka poso byo afwile Heloda: kufikizha akya kyo aambile Nkambo mu kanwa ka

ngauzhi wanji amba, Mu Ijipita mo mo naichile mwanami. <sup>16</sup>Ke-po Heloda, pa kumona byo bawendeleka ku ba mana, wabukile bingi bukaji. Ponkapo wibemenye bantu ne kwibepaya wibepayile bana bonse ba bachebache ba balume ba mu Betelema, ne ba monse mu mbaji, ne ba myaka ibiji, ne bakyangye kufikizha myaka ibiji monka mo aumvwijile mwa-ka ku ba mana. <sup>17</sup>Kepo pafikile kyaambilé Yelemiya, ngauzhi wa Lesa, amba, <sup>18</sup>Mu Lama mwaumvwanyikile jiwi ja kuji-la majilo ne kujila mabingo akatampe, Lechela saka ebajila bana banji; ne kuswa kumute-kenesha pa muchima ne, mambó bafwapo. <sup>19</sup>Kabiji byafwile Heloda, ponkapo malaika wa Nkambo wamwekele mu kiloto kwi Yosefwa mu Ijipita'mba, <sup>20</sup>Buka, utwale mwana ne inanji, ubwele mu kyalo kya Isalela:



mambo bafwa basakilénga kwi-paya mwana.<sup>21</sup>Ne pa kubuka wa-sendele mwana ne inanji, kaiye mu kyaló kya Isalela.<sup>22</sup>Kabiji pa kumvwa'mba, Akeleusa wala-ma kyaló kya Yudea, wamu-pingakene shanji Heloda, wa-chiinenga kuyako; kabiji byo

bamujimuna kwi Lesa mu kilo-to, wasezhezhe ne kwiya mu kyaló kya Ngalilea;<sup>23</sup>kabiji pa kwiya, waikele mu muzhi ye batela'mba, Nazala; kufikizha kyaambilé bangauzhi ba Leza amba, Bakamutela'mba, mwina Nazala.

## BYA KUBA

A. Ano mepuzha akonsha kukumbulwa na EE nangwa INE. Inge mukumbu ye “EE,” nembai Ee ku mpelo ya jipuzho. Inge mukumbu ye “INE,” nembai Ine.

1. Yesu wasemenwe mu Betelema wa mu Yudeanyi? \_\_\_\_\_
2. Ba mana bamwene kabangabanga ku muselanyi? \_\_\_\_\_
3. Mfumu Heloda wasekejile pa kumvwa'mba Yesu wasemwanyi? \_\_\_\_\_
4. Ba mana babwelele kwi Heloda ne kumubula ko ase-menwe mwana Yesunyi? \_\_\_\_\_
5. Malaika wa Nkambo wamubujile Yosefwa kunyemena mu lüpítanyi? \_\_\_\_\_
6. Mfumu Heloda waipayile bana bonse bacheche ba myaka ibiji ne bakyangye kufika ku myaka ibiji monka mu Betelema ne monse mu mbajinyi? \_\_\_\_\_
7. Yesu waikajile kimye kimo mu muzhi wa Nazalanyi?

B. Nembai byashalapo byafuma mu veleshi mu kibaba.

“Kabiji pa kutwela mu nzubo bamwene mwana sa aji ne inanji \_\_\_\_\_; ke bamulambile ne kumulambila pansi ne \_\_\_\_\_; ponkapo basolwele nsabo yabo ne kumupa bya bupetu, bya \_\_\_\_\_ ne libona ne \_\_\_\_\_.”

## MULAMBO MUTANSHI

Ba mana baletete mulambo mutanshi kwi Yesu. Kya bupe kya ngolode kyamwesheshe'mba ye mfumu. Libona ne mola byajinga byanunka bulongo byafuma mu bichi bya ku musela, kabiji byajinga na mutengo mukatampe. Mola watongwele bumuntu bwanji; ko kuba'mba wasemenwe pamo ne bantu. Kabiji watongwele kuzhikwa kwanji pamo. Libona watongwele bulesa bwanji. Kampe ne atweba kechi twakonsha kumupa Yesu bya bupe bya mutengo wa byonkabyo ne, bino twakonsha kumupa kya bupe kyakila mu kuwama, ko kuba'mba twipane atwe bene kwi aye Yesu.

## BA MANA BAPOPWEJILE YESU



Twamona mu Kibaba 2 amba ba mana bamupopwejile Yesu. Kechi bamupopwejile Maliya ne. Maliya wajingatu inanji Yesu wa pano pansi, kabiji Yesu byo awfiele pa musalabu, wapaine inanji kwi Yoano. Mu Yoano 19:26, 27 tutanga'mba, “**Yesu pa kumona inanji, ne yewa mwana wa bwanga ye atemmenwe, kasa aimana kwipi,**

**waambijile inanji amba, Mama, talai mwanenu! Kabiji waambijile yewa mwana wa bwanga, amba, Talai, inenu!**” Tujimuke amba kechi tupopwele bankishi nangwa kupana buneme bwa Lesa ku bantu ne. Twafwainwa kupopwela Nkamba Yesu Kilishitu, Mupulushi wetu. Vulukai amba mu Kibaba I twatangile jizhina jikwabo ja Yesu ko kuba'mba **Emanuele**, Lesa tuji nanji. Kino kitufunjisha'mba Yesu ye Lesa! Onka mambo, kwajinga juba jawama Yesu byo aishile panopantanda ke mwana

mucheche, kabiji wakomenenga pakachi ka banabalume ne banabakazhi. Yesu ye Lesa wamweka ku bantu mu bumentu. (Tangai Yoano 1:1, 14; Kolose 2:9; Mateo 12:50.)

### KIBABA 3. YESU WABATIZHILWE KWI YOANO MUBATISHI



Mateo 3:1-6 ne 13-17

<sup>1</sup>Kabiji mu aa moba kwashile Yoano Mubatishi, sa asapwila mungyetu mu ntanda ya Yudea'mba, <sup>2</sup>Lapilai; mambo bufumu bwa mwiulu bwafwanya ke pepi. <sup>3</sup>Yoano i ye ye anenene Isaya, ngauzhi wa Lesa, amba, Jiwi ja umo ubijika mungyetu amba, nengezhezhai jimo jishinda ja Nkambo, ololai mashinda anji. <sup>4</sup>Kabiji aye Yoano wajinga na kivwalo kyanji kya boy a bwa ngamela, ne mukwa-

ndala mu kifuka kyanji; ne kajo kanji kajinga nzhiye ne buki bwa mungye. <sup>5</sup>Ponkapo bamupwijilenga ba mu Yelusalema, ne ba mu Yudea bonse, ne bonse ba mu musezho wa Yodano; <sup>6</sup>ne kubatizwa babatizhilwe kwi aye mu mukola Yodano, kasa kesolola ne mambo abo. <sup>13</sup>Ponkapo Yesu wafumine mu Ngalilea, waishile kwi Yoano ku Yodano mu kubatizwa kwi aye. <sup>14</sup>Kabiji Yoano wamukainye'mba, Amiwa nafwainwa kubatizwa kuji anweba, pakuba kabiji anweba mwaiya ko nji amiwanyi? <sup>15</sup>Ne Yesu pa kumvwa wamwambile'mba, Byonkabyo pano nswai, pa kuba mo mo kitufwainwa tufikizhe bololoke bonse. Ponkapo wamuswile. <sup>16</sup>Ne Yesu, byo abatizhilwe, ponkapotu watuntukile mu mema: kabiji talai, mwiulu mwashinkukile, ne aye wamwene ne Mupashi wa Lesa sa ekila pamo nobe nkunda, ne kumwikijila; <sup>17</sup>kabiji ponkapo ne jiwi jafumine mwiulu amba, Uno ye mwanimi, ye natemwa, mo namwena lusekelo.

## BYA KUBA

Nembai byambo byafwainwa mu byashalapo. Mikumbu yonse yatanwa mu Kibaba 3.

1. Yoano Mubatishi wasapwijile jino jiwi: Lapilai; mambo bufumu bwa \_\_\_\_\_ bwafwenya ke pepi.
  2. Yoano wajile \_\_\_\_\_ ne \_\_\_\_\_.
  3. Nanyi waishile kwi Yoano mu kukeba kubatizwa?
- 
4. Yesu byo atuntukile mu mema, Mupashi wa Lesa wamwikijile nobe \_\_\_\_\_.
  5. Jiwi jafumine mwiulu amba, “Uno ye \_\_\_\_\_ ye natemwa, mo namwena lusekelo.”

## KULAPILA KO KUBA'MBA KA?

Kulapila ko kuba'mba tumvwa bulanda mu michima na mambo a kyo twaubile nangwa kyo twabujile kuba, kabiji tuji na kizaku mu michima yetu ya kwalula ne kuba kintu kyawama kimye kikwabo. Kulapila ko kuba'mba kuvundamina byatama ne kutendeka kuba byawama. Byatama byo tuba bo bubi. Kabiji byonse byabula kutokesha Lesa pa muchima bo bubi. Kulapila kwa kine kileta kwalula kwa mu muchima. Kishimpi kya Bakaonde kyaambile'mba, “Naja nyenye, kechi nkabwezhapo jibiji ne.” Inge twalomba kwi aye Yesu, Yesu uketukwasha kwikalala na bulume bwa kuleka byatama. Wakonsha kwalula muchima wa bubi amba ekale watoka to. Wakonsha kufumya bubi bwetu ne kubika Mupashi Wazhila mu michima yetu. Nanchi wamwipwi-





zhe kala Yesu kutwela mu muchima wobenyi?

Uno mwana mucheche ubena-kulomba kwi Yesu. Ubenakwi-solola ne kumubula Yesu amba waumvwa bulanda na mambo a bubi bwanji. Waumvwa bulanda na mambo a byonse byatama byo aubile. Yesu ukomvwa milombelo yanji ne kumulekelako mambo anji. Ukemukwasha kuba byawama. Ukemupa muchima watoka. Kulomba kwi Yesu pa juba pa juba kukamukosesha kuba bintu bitokesha Yesu pa muchima.

## KUSHIMUNA KWA KUKUMYA

Lesa mu basatu wajingako ku lubatizilo lwa Yesu Kilishitu: (1) Lesa Tata waambile mwiulu amba, "Uno ye mwanami, ye natemwa, mo namwena lusekelo." (2) Lesa Mwana, ye wabatizhilwe kwi Yoano. Jizhina janji Yesu mambo waishile mu kwitupulusha ku bubi bwetu. (3) Lesa, Mupashi Wazhila, sa ekila pamo nobe nkunda ne kumwikijila Yesu.

Kine butemwe bwa Lesa bwawamisha byo emwesha mwine kwi atweba mu ano mashinda asatu!

## KIBABA 4. YESU WAESEKWA KWI DIABOLA

Mateo 4:1-11

<sup>1</sup>Ponkapo Yesu bamutwajile kwi Mupashi mungyetu amba bamweseke kwi Diabola. <sup>2</sup>Kabiji pa kuzhikilwa na nzala moba makumi ana, mute ne bufuku,

kepo aumvwine ne nzala. <sup>3</sup>Ne wa kumweseka pa kwiya, wamwambile'mba, Umvwe mwi Mwana Lesa, ambilai ano mabwe áluke ke bashinkwa. <sup>4</sup>Kumvwa aye'mba, Kyanembwa'mba, Muntu kechi akamwene bumi ku



shinkwa yenka ne, poso ku byambo byonse bifúma mu kanwa ka Lesa. <sup>5</sup>Ponkapo Diabola wamutwajile ku muzhi wazhilá; kabiji wamwikajikile peulu ya jikonka ja nzubo ya Lesa, <sup>6</sup>wamwambile'mba, Umvwe mwi Mwana Lesa, mwiele pansi: mambo kyanembwa'-mba, U kemulayila bamalaika banji: kabiji'mba, Bakemusenda

mu maboko abo, kuchina'mba mwaketuntula kulu kwenu ku jibwe. <sup>7</sup>Kumvwa Yesu wamwambile'mba, Kabiji kyanembwa'-mba, kechi umweseke Nkambo Lesa wobe ne. <sup>8</sup>Ponkapo Diabola wamutwajile ku mutumba walepeshá bingi, ne kumumwesha bufumu bonse bwa panpantanda, ne lukumo lwabo; <sup>9</sup>ne kumwambila'mba, Bino byonse nsakwimupa, umvwe mundambile ne kumpopwela. <sup>10</sup>Kumvwa Yesu wamwambile'mba, Fumako, Satana: mambo kyanembwa'-mba, U kamupopwela Nkambo Lesa wobe ne kumwingijila aye yenka. <sup>11</sup>Ponkapo Diabola wamulekele; kabiji ponkapo bama laika baishile, ke bamwingijile ne kumwingijila.

## BYA KUBA

A. Kumbulai mepuzho na mikumbu yatanwa mu Kibaba 4.

1. Kuzhikilwa na nzala ko kuba'mba kwikala kwa kubula kajo. Yesu waikajile moba anga kwa kubula kajo? \_\_\_\_\_.
2. Nanyi waishile kwi Yesu mu kumweseka? \_\_\_\_\_.
3. Diabola wamusakile Yesu kwalula mabwe ke \_\_\_\_\_. \_\_\_\_\_.
4. Diabola wamusakile Yesu kwielia pansi kufuma ku jikonka ja \_\_\_\_\_. \_\_\_\_\_.
5. Diabola wamusakile Yesu kumulambila ne \_\_\_\_\_. \_\_\_\_\_.

B. Labijilai uno veleshi:

**“...Ukamupopwela Nkambo Lesa wobe ne kumwingijila aye yenka.”**

—Mateo 4:10b

## YESU KECHI WAKOKELA DIABOLA NE

Diabola wamusakile Yesu kumukokela. Yesu wayukile jiwi ja Satana. (Mu Kibaba 4 twamona jizhina jikwabo ja Diabola, ko kuba’mba Satana.) Diabola wamusakile Yesu kwingijisha bulume bwanji mu jishinda jatama. Ko kwamba’mba wamwe-sekelenga Yesu. Wasakile kweseka Yesu mu kuba’mba alenge mambo. Bino Yesu kechi wakojejile Diabola ne. Onkao mambo, Yesu washinjile Diabola kabiji kechi walengele mambو ne. Bya Iweseko bisatu byaishile kwi Yesu, bino Yesu kechi wibikokejile ne. Langulukai, Diabola wasakile Yesu kumupo-pwela aye. Kechi twafwainwa kupopwela Diabola ne. Kizhila! Yesu wakonsheshe kwikala munonshi mwayila bya panopan-tanda inge waumwwine jiwi ja Satana, bino Yesu kechi wasa-kile bunonshi ne, inge wibumona mu kuteleka ne kumwingijila aye Satana. Onkao mambo, ne atweba twafwainwa kujimuka. Kechi tukebe bunonshi mu kuba byatama nobe kubepa na-ngwa kwiba nangwa kukana Yesu Kilishitu Nkambo yetu ne. Twafwainwa kubika Kilishitu ke mutanshi mu bwikalb bwetu ne kuba kyaswa muchima wanji nangwatu tukayanda. Yesu waaluka ke wayanda na mambo a anweba ne amiwa mu kuba’mba ne atweba tukatambule bumi bwa myaka, kabiji amba juba jimo tukekale nanji mwiulu myaka ne myaka (2 Kolinda 8:9).

Kechi twafwainwa kwingijisha bulume mu jishinda jatama ne. Kyawama kweseka kulama mizhilo ya ntanda ne kulama mibiji yetu bulongo. Yesu witufunjisha bino bintu byo akaine kwiela pansi kufuma ku jikonka ja nzubo ya Lesa. Kechi twafwainwa kwikozha mibiji yetu atwe bene ne.

## BYAUBILE YESU MU KUSHINDA SATANA

Kyonse kimye Satana byo amwesekele Yesu mu kulenga mambo, Yesu waingijishe BYAMBO BYA LESA. Ne atweba netuwa twafwainwa kuba pamotu. Buku Wa Lesa byo byambo bya Lesa. Kutanga Buku Wa Lesa kwitukosesha. Kitufwainwa

kufunda maveleshi avula a mu Buku Wa Lesa mu kuba'mba etukwashe kushinda Diabola. Lweseko byo Iwitufikila kechi ko kuba'mba bubi ne. Inge tukokela lweseko, pano twalenga mambo. Buku Wa Lesa witubula mu Bahebelu 4:15 amba, Yesu "**waesekelwé monse monse pamo ne atweba, byonkabyo wabujilwe bundengamambo.**" Yesu kechi wakojejile lweseko nangwa lumo lwa Diabola ne!

### VULUKAI KINO

Mawi onse akufikila obewa mu kukulengela kulenga mambo jo jiwi ja Satana. Kechi jo jiwi ja Lesa ne. Bukiji bukiji lomba kwí Yesu amba akukoseshe mu kuba'mba kechi ukakokele jiwi ja Satana ne. Satana byo amona'mba kechi wakonsha kukwese ka mu kulenga mambo ne, pano ukakuleka byonka byo amulekele aye Yesu.

### KIBABA 5. YESU USALULULA BANKWASHO



Mateo 4:17-22

<sup>17</sup>Ponkapo kufuma ku akya kimye Yesu watatwile kusapwila'mba, Lapilai; mambo bufumu bwa mwiulu bwafwenya ke pepi. <sup>18</sup>Kabiji Yesu byo asezhezhenga kizhiba kya Ngalilea, wi-bamwene banabankazhi babiji, Shimona ye batela'mba Petelo, ne Andeleo mulongo wanji, sa ba-

ta bukonde mu mema; mambo bajinga na mwingilo wa kukwata masabi. <sup>19</sup>Ne aye wibambile'mba, Ndondelai, kabiji nke-mwalula ke ba mwingilo wa kukwata bantu mu kwibapulusha. <sup>20</sup>Kabiji ponkapotu bealekele makonde abo, ke bamulondele. <sup>21</sup>Byo aendeleko kacheche wa-mwene banabankazhi bakwabo babiji, Yakoba mwana Zebede, ne Yoano mulongo wanji, bajinga mu bwato ne shabo Zebede pamo, na kununga makonde abo; kabiji ne abo wibechile. <sup>22</sup>Kabiji ponkapotu ne abo nabo balekele ne bwato ne shabo, ke bamulondele.

## BYA KUBA

- A. Kumbulai mepuzho. Mikumbu yonse yatanwa mu Kibaba 5.
1. Mulongo wanji Petelo wajinga na ñanyi jizhina? \_\_\_\_\_
  2. Bano banabankazhi babiji baubilenga ka? \_\_\_\_\_
  3. Yakoba, mwana Zebede, naye wajinga na mulongo wa ñanyi jizhina? \_\_\_\_\_
  4. Bano banabankazhi banungilenga ka? \_\_\_\_\_

B. Labijilai uno veleshi. Yesu waambile bino byambo ku bano banabankazhi. “...Ndondelai, kabiji nkemwalula ke ba mwingilo wa kukwata bantu mu kwibapulusha.”

## LWITO LUKATAMPE LWA KULONDELA YESU

Bano ba kuloba masabi bafwainwe kusekela bingi pa kumwva Yesu saka ebeta mu kumulondela aye. Ponkapotu bakokejile na lusekelo. Mu kifulo kya kuloba masabi mu makonde abo, pano bakakwata bantu ne Yesu. Yesu ukeba ba kumulondela bavula. Yesu wasaka bantu bonse kumulondela. Ne obewa, ubenakulondela Yesunyi? Inyi ne, kana mambo ka? Kana wakilangulukilepo kalanyi? Lwito lukatampe lwakila lo twakonsha kutambula, lo lwito lwa Yesu Kilishitu lwa kwiya ne kumulondela. Kulondela Yesu kwitutwala ku bumi bwa myaka. Mu Yoano 14:6, Yesu waamba’mba: “...Amiwa ne jishinda, ne bukine, ne bumi: ka paji wiýá kwi Batata ne, poso pe amiwa.”

## KIBABA 6. BYO AFUNJISHENGA KILISHITU

Mateo 5:1-12

<sup>1</sup>Kabiji pa kwiamona mabumba, wakanjjile pa mutumba: byo aikele, bana banji ba bwanga baishile kwi aye: <sup>2</sup>ponkapo pa kuttula kwamba wibafunjishenga’mba, <sup>3</sup>Ba michima yapelewá bo batokwa: mambo bufumu bwa mwiulu bo bwabo. <sup>4</sup>Bajila majilo



**bo batokwa: mambo bakateneshiwa.** <sup>5</sup>Ba kimote bo batokwa: mambo bakaswana ntanda yonse. <sup>6</sup>Baumvwá nza-la ne kilaka kya kusakisha bololoke bo batokwa: mambo bakekuta. <sup>7</sup>Bóba lusa bo batokwa: mambo bakobilwa lusa. <sup>8</sup>Ba michima yatoká to bo batokwa: mambo bakamumo-na Lesa. <sup>9</sup>Bapwánya bantu bo batokwa: mambo bakatelwa-'mba, Bana ba Lesa. <sup>10</sup>Bo bap-

ata na mambo a bololoke bo batokwa: mambo bufumu bwa mwiulu bo bwabo. <sup>11</sup>Kabiji anweba mwi batokwá umvwe bantu bemwambila mwenga, ne kwimupata, ne kwimubepela mu misango yonse ya bubi, na mambo a amiwa. <sup>12</sup>Se-kelai, ne kusangalala: mambo mfweto yenu ikatampe mwiulu: mambo bechapachilenga byonkabyo ne bangauzhi ba Lesa ba kala bemutangijilé.

## BOBA LUSA BO BATOKWA

Juba jimo muntu waendele mu ntanda yakatazha kabiji wasambakene kabwa wajinga na kulu kwakozhiwa. Uno muntu watayile kimye mu kutala kulu kwa kabwa kabiji watainemo mwiba. Wafuminye bulongo mwiba ne kowa waovwele kulu kwa kabwa ne kukasa wikukashile na kitambala kyanji. Pano kabwa watendekele jibiji lwendo lwanji.

Pa kupita moba, uno muntu wakwachilwe na balwanyi. Bamutayile mu kaleya ne kufukula kumwipaya. Ponkapotu kabwa wa mukulumpe wa pa bano balwanyi wanyemene ku kaili ne kutendeka watendekele kumyangapo maboko anji ne kumwesha butemwe bukatampe. Mukulumpe wataine'mba kabwa wanji wapulukilwe na uno muntu. Wajinga na lusekelo lukatampe na mambo a lusa lwa uno muntu kabiji wamukasulwile.

**“Bóba lusa bo batokwa: mambo bakobilwa lusa.”**

## BANTU BATOKWÁ

Mu Kibaba 6, kyambo kya “batokwa” kyaingijishiwa bimye bitanu na bina (9). Bino bilumbulula muchima wa mwina Kilishitu. Lesa witupele mikambizho jikumi kabiji Yesu witupele bino bintu 9. Kabiji mu Lumwekesho 22:14 muji “batokwa” kikwabo - **“Batokwa baovwá bivwalo byabo, amba twi-**

**kale na lüsa lwa pa kichi kya bumi, ne kutwela mu  
bibelo bya mu muzhi.”**

## KIBABA 7. YESU WITUFUNJISHA MWA KULOMBELA



Mateo 6:5-15

**5**Kabiji pa kulomba, kechi mupashañane ne bakamfutum-futu ne: mambo abo batemwa kwimana na kulomba mu mashinagoga ne ku mansanga a mikwakwa, amba, tumweke ku bantu. Kine nemwambila namba, Batambwila jimo mfweto yabo. **6**Kabiji obewa, pa kulomba, utwele mu kazubo kobe ka mukachi, ne pa kushinka kibelo, ulombe kwi Shobe wa ku mbaji, kabiji Shobe umóna ku mbaji ukakufweta. **7**Kabiji pa kulomba, ke kulomba kilombe-

lombe byo boba Bagentila ne: mambo balanguluka’mba, Tu-sakumvwanyika pa kuvuzha byambo. **8**Kabiji byonkabyo kechi mupashañane nabo ne: mambo Shenu wayukila jimo byo mwa-kajilwa, po mukyangye kumulomba. **9**Byonkabyo sa mulomba byonka bino amba, Tata wetu wa mwiulu, Jizhina jenu jizhile. **10**Bufumu bwenu bufike. Kyaswa muchima wenu kyubiwe pano pansi, byonka byo kyubiwa mwiulu. **11**Mwitupeko kajo ketu ka lelo. **12**Ne kwitulekelako mambo etu, byonka byo twibale-kela betulénga mambo. **13**Kabiji kechi mwitutwale mu lweseko ne, mwitupokolole kwi yewa mubi.

**14**Mambo umvwe mwibalekelako bantu mambo abo, ne Shenu wa mwiulu naye ukemulekelako ne mambo enu pamo. **15**Kabiji umvwe kechi mwibalekelako bantu mambo abo ne, ne Shenu wa mwiulu naye kechi ukemu-lekela mambo enu ne.

### BYA KUBA

A. Munshi muji milombelo Yesu yo etufunjisha kulomba. Byambo bimo byashalapo. Talai jibiji mu Kibaba 7 ne kunemba byambo byashalapo.

Tata wetu wa \_\_\_\_\_, Jizhina jenu jizhile. Bufumu bwenu bufike. Kyaswa muchima wenu kyubiwe \_\_\_\_\_, byonka byo kyubiwa \_\_\_\_\_. Mwitupeko \_\_\_\_\_ ketu ka lelo. Ne kwitulekelako mambo etu, byonka byo twibalekela \_\_\_\_\_ mambo. Kabiji kechi mwitutwale mu lweseko ne, mwitupokolole kwi yewa \_\_\_\_\_. Mambo bufumu bo bwenu ne \_\_\_\_\_ ne \_\_\_\_\_ myaka ne myaka. Amena.

B. Labijilai luno lulombelo. Ko kumwenako kwa kwitutangijila mu kulomba kwa kine. Mu luno lulombelo twakonsha kufunda byavula:-

1. Tata wetu wikala **mwiulu kabiji** ye **Tata wetu**. Ye witulengele ne kwitutemwa.
2. Kechi twafwainwa kwijingijisha jizhina janji mu jishinda jatama ne. Twafwainwa kuzhila jizhina janji. **Jizhina jenu jizhile**.
3. Bonse baji mwiulu babenakuba kyaswa muchima wa Lesa. Kitufwainwa kulomba'mba kyaswa muchima wanji kyubiwe ne pano panshi pamo. Inge bonse boba kyaswa muchima wanji, nanchi ntanda yetu ikapusana bingi!
4. Twakonsha kumubula Lesa Tata byonse byo tusaka ne kumwipuzha kwitupa kajo ketu ka lelo. Wasaka kwitumwena bya kukajilwa byetu byonse. Kabiji wakonsha kwitukwasha mu makatazho onse a mu bwikalobwetu.
5. Twakonsha kwibalekelako mambo bakwetu byepi? Yesu wakonsha kwitulekelako mambo etu byonka byo twibalekela bakwetu. Lesa kechi wakonsha kwitulekelako mambo ne, umvwe tuji na bukaji nangwa bululu nangwa bushikwe nangwa kushinkanya mu michima yetu. Twakonsha kutambula luleko lwa mambo kwi Lesa kanatu twibalekela mambo betulenga mambo.
6. Lesa uji na bulume bonse bwa kwitupokolola mu lweseko ne mu byatama.
7. Lesa wakonsha kuba byonse byo tumwipuzha mambo bufumu bo bwanji ne bulume ne lukumo pamo.

## KIBABA 8. KULAMWINA KWA LESA KWA PA JUBA PA JUBA



Mateo 6:25-34

<sup>25</sup>Kepo nemwambila namba, Kechi mubambishe michima na mweo wenu ne, nangwa na byo mukaja, nangwa na byo mukatoma; nangwa na bya mibiji yenu, byo mukavwala ne. Mweo kechi wakila kajo nenyi? Ne mubiji kechi wakila bivwalo nenyi?  
<sup>26</sup>Talai ku bañonyi, kechi babyala ne, nangwa kunowa ne, nangwa kulonga mu matale ne; kabiji Shenu wa mwiulu wibajisha. Anweba kechi mwibakila bañonyi mu kunema nenyi?  
<sup>27</sup>Kabiji ñanyi mukwenu pa kumbambisha muchima ukonsha kwinungako nangwa kacheche ku kimino kyanji? <sup>28</sup>Kabiji ma-

mbo ka mubambisha michima na bivwalo? Langulukai buluba bwa mungye byo bukoma, kechi bwingila mwingilo ne, nangwa kuluka kisapi ne: <sup>29</sup>ka-biji nemwambila namba, nangwa Solomone mu lukumo lwanji lonse ka awwajile pamo ne abo ne. <sup>30</sup>Nanchi umvwe Lesa wiivwika byonkabya nsono ya mungye, ya lelo jonka, kesha yatawiwa mu mujilo, anweba ba kalwitabilo kacheche, kabiji kechi akemuuvwike nenyi? <sup>31</sup>Byonkabi kechi mubambishe michima yenu'mba, Lelo tusakuja ka? nangwa'mba, Lelo tusakutoma ka? nangwa'mba, Lelo byo tusakuvwala i bi ka? <sup>32</sup>Mambo bino byonse bisaka Bagentila; pakuba Shenu wa mwiulu wayuka'mba, Bino byonse mwibifwainwa. Nanchi sambilai kukebesha bufumu bwanji, ne bololoke bwanji; ne bino bintu byonse bikemubikilwapo. <sup>33</sup>Byonkabyo kechi mubambishe michima yenu na ja kesha ne: mambo ja kesha jine jikebambisha na byajo. Bibi bya lelo bijiwaina lelo.

BYA KUBA

Labijilai uno veleshi: “**Nanchi sambilai kukebesha bufumu bwanji, ne bololoke bwanji; ne bino bintu byonse bikemubikilwapo.**”

—Mateo 6:33

## MAFUNJISHO AFUMA KU BAÑONYI

Kana mwatalapo kala bañonyi bacheche saka batumbuka mwiulunyi? Bají na lusekelo. Kechi bají na bya kukajilwa ne. Kechi bají na moyo ne. Pa juba pa juba lukelo babuka saka babenakwimba. Pa juba pa juba bají na lusanchilo na mambo a kajo ko baja. Kechi babambisha michima na mambo a kajo ka kesha ne. Bayuka'mba bakekala na kajo kesha. Baketekela Lesa'mba ebalame.

Obewa ne amiwa twafwainwa kwikala pamo ne bañonyi. Kitufwainwa kusekela ne kwimba nyimbo ya kutota Lesa pa juba pa juba. Kechi twafwainwa kubambisha michima pa mambo a kajo ka kesha ne. Lesa ye walengele bañonyi ne kwibakwasha kutana kajo pa juba pa juba, i ye wakonsha kwitukwasha kwikala na kajo moba onse. Kitufwainwa kuketekela Lesa. Twibakila bañonyi bavula mu kunema.

## MAFUNJISHO AFUMA KU MALUBA

Kana mwamonapo kala malubanyi? Ko aji maluba avula apusana-pusana amena mungye. Aji na buya bwawama. Yesu waambile'mba ano maluba avwala bulongo kukila byo avwajile mfumu Solomone munonshi. Bino maluba kechi alanguluka pa mambo a byo akawwala ne. Lesa wiapa buya bwao ne kwiawwika na misombelo yawama. Obewa ne amiwa twafwainwa kufunda kuketekela Lesa na bivwalo byetu. Lesa ye witulengele kabiji witukebela kumuketekela na bya kuvwala. Twiakila maluba mu kunema.

## KYAKILA MU KUNEMA

Mulaye wa Lesa kwi obewa ne amiwa watanwa mu veleshi wetu wa kulabijila. Twafwainwa kusambilika kukebesha Lesa. Ye wafwainwa kwikala ke mutanshi mu milanguluko yetu, mutanshi mu michima yetu, kabiji mutanshi mu bwikalobwetu. Twafwainwa kwikala ne aye Lesa ne kumutemwa kukila byonse bikwabo panopantanda. Umvwe tumuswisha kwikala ke mutanshi, nanchi wakonsha kwitulama bulongo kukila byo twakonsha kuba atwe bene.

## KIBABA 9. BUWAME BWA LESA KWI ATWEBA



Mateo 7:7-12

<sup>7</sup>Lombai, mukekitambula; kebai, mukekimona; konkonshai, bakemushinkwilako; <sup>8</sup>mambo bonse balómba batambula; ukéba naye, wikimona; ukonkónsha na-

ye, bakamushinkwilako. <sup>9</sup>Nanyi mukwenu uba, umvwe mwana-nji wamulomba shinkwa, wa-mupa jibwe; <sup>10</sup>nangwa umvwe wamulomba jisabi, wamupa mulolo? <sup>11</sup>Byonkabi anweba babi, umvwe mwayuka kwibapa bana benu byawamá, lelo She-nu wa mwiulu kechi akemukile mu kupana byawamá kwi abo bamulomba nenyi? <sup>12</sup>Byonka-byo, bintu byonse byo musaka' mba, bantu betubile, ne anweba sa mwibobila byonkabya: mambo muno mo mwayila mabu-ku a Mizophilo ne a Bangauzhi ba Lesa.

### MAFUNJISHO AFUMA KU BYAMBO BIJI PEULU

1. Lesa ukumbula milombelo kabiji kitufwainwa kulomba kwi Lesa Tata wetu wa mwiulu.
2. Butemwe bwa Tata wetu wa mwiulu bwakila butemwe bwa bansemi ba panopantanda. Onkao mambo, uketupa bintu bya-wama nangwa abya bintu bitukwasha.
3. Aba bakebesha Lesa na muchima yense bakatambula mapesho.
4. Mafunjisho onse aji mu Buku Wa Lesa amwesha kino kya bukine kikatampe - bintu byonse byo musaka' mba bantu betubile, ne anweba sa mwibobila byonkabya. "Bakwabo" kitongola' mba bantu bonse bomi, kechi muntu wa mu kisaka kyetu nangwa mukoka wetu kwapwa ne.

### BYA KUBA

Labijilai uno veleshi wanema - bamutela' mba "muzhilo wa

**ngolode.” “Byonkabyo, bintu byonse byo musaka’mba bantu betubile, ne anweba sa mwibobila byonkabya....”**

—Mateo 7:12

## **BIMWEKA MAMBO A KULONDELA UNO MUZHILO WA NGOLODE**

Banabalume ne banabakazhi inge baikala mwayila uno mu-kambizho wa Yesu, bintu byavula byawama bimweka. Bimo byo bino:-

1. Bashimika bipatela bya kulama bakolwa.
2. Bashimika mazubo a kukwasha bayanda ne banabanshi-wa. Balama bakota babula balongo ba kwibakwasha.
3. Bawamisha kaleya mu kuba’mba bakaili bekale mu mpu-nzha yatoka.
4. Bebakasulula bantu bajji mu buzha mu kuba’mba bekale mu bwana bwa bene.
5. Bakwasha bayanda na bivwalo ne kajo.
6. Bantu betemwa abo bene na bene ne kweseka kwi-sendela bisendwa abo bene na bene.
7. Bantangi baeseka kulenga mizhilo yakonsha kwibalama bulongo aba bajji mu luusa lwabo.
8. Bantu bakasuluka kupopwela Lesa mu mashinda afwai-nwa.

## **JIPUZHO JAWAMA JA KWIIPUZHA MWINE**

Umvwe kechi wayuka mwayila kulondela “muzhilo wa ngolode” mu bwikalobwobe ne, nangwa umvwe kechi wayuka mwa kukwashisha mwenyi nangwa mulunda nangwa mulwanyi ne, pano iipuzhe obe mwine jino jipuzho:- “Inge naikala mu kifulo kyanji, nanchi nakonsha kumukebela uno muntu kungubila ka?” Inge wakumbula jino jipuzho bulongo mu muchima wobe ne apa bino kwikyuba, pano walondela “muzhilo wa ngolode.”

# KIBABA 10. BANTUNGI BABIJI



Mateo 7:24-29

<sup>24</sup>Byonkabyo aye úmvwa bino byambo byami, ne kwibyuba, bakamupashañanya no muntu wa mana, wantungilé nzubo yanji pa jibwe: <sup>25</sup>ne mvula wanokele, ne mikwe yapomokele

konka, ne kipupu kikatampe kyapupilenga ponka pa nzubo; kabiji kechi yakundukile ne: mambobeitungile pa jibwe. <sup>26</sup>Kabiji aye úmvwa bino byambo byami, ne kwibyuba ne, bakamupashañanya no muntu wa bulwá mana, watungilé nzubo yanji pa musenga: <sup>27</sup>ne mvula wanokele, ne mikwe yapomokele konka, ne kipupu kikatampe kyapupilenga ponka pa nzubo; kabiji yakundukile: ne kukanduka kwayo kwaji kungi kawakatazha! <sup>28</sup>Ponkapo, Yesu byo apwishishe kwamba bino, mabumba akuminye mo afunjisenga: <sup>29</sup>mambo wibafunjishenga pamo ne wa lüsa, kechi pamo ne banembeshi babo ne.

## BYA KUBA

Mu mapunzha ashala munshi, nembai byambo byafwainwa byafuma mu Kibaba 10.

1. Muntu waumvwine byambo bya Yesu ne kwibyuba, wapashañene nobe muntu wa \_\_\_\_\_ watungile nzubo yanji pa jibwe.

2. Muntu waumvwine byambo bya Lesa ne kwibyuba ne, wapashañene nobe muntu \_\_\_\_\_ watungile nzubo yanji pa musenga.

## NTUNGI WA MANA

Inge twakeba kwikala pamo ne ntungi wa mana, nanchi twafwainwa kumvwa byambo bya Yesu ne kwibyuba. Byambo bya

Yesu byatanwa mu Buku Wa Lesa. Byambo byavula bya Yesu byatanwa mu Mateo, buku ye tubenakufunda pano. Umvwe tushimika bwikalobwetu pa byambo bya Yesu ne kulondela Yesu mwine, pano twakonsha kwikala saka twalamwa mu bipupu byonse bya buno bwikalobwetu. "Bipupu bya buno bwikalobwetu" bitongola bipimo ne makatazho ne bisendwa byakosa, nangwa bya bulanda bitufikila. Yesu jo jibwe. Ye wa kine ne kushikamatu; kechi wakonsha kushindwa ne. Inge tushimika bwikalobwetu pe Yesu, pano uketukwata bulongo kabiji kafwako nangwa kimo kyakonsha kwitufumya kwi Aye ne. Ne obewa, wasaka kwikala ke ntungi wa mananyi? Pano swisha Yesu kutwela mu muchima wobe ponka pano. Lomba kwi Yesu ne kumwipuzha kutwela mu muchima wobe. I byo byo asaka Yesu. Shinkula kibelo kya muchima wobe, kabiji Yesu ukatwela.



## LULOMBELO

Nkambo nalomba namba mun-dekeleko mambo ami onse. Tokeshai muchima wami. Ikalai mukachi kami pa juba pa juba. Ntangijilai amiwa mu byonse byo nguba ne kwamba.

Mu Lumwekesho 3:20 Yesu waamba bino byambo kwi obe-wa:- "**Tala, naimana ku kibelo kasa nkoka: umvwe muntu waumvwa jiwi jami ne kunshinkwilako, amiwa nkawela mo aji ne kuja na-nji, ne aye ne amiwa.**"

## NTUNGI WABULA MANA

Bantu bamo kechi bakokela byambo bya Lesa ne. Bateleka-tu kabiji ponkapotu bavulama byo baumvwa. Baji pamo nobe muntu wabula mana. Bipupu bya buno bwikalobwetu byo bibafiki-

la, kechi bakonsha kwimana saka bakosa ne, kanatu kukanu nduka pamo ne nzubo yashimikwa pa musenga. Kyo kya bulanda. Kechi bamuswisheshe Yesu Kilishitu kutwela mu michima yabo ne, kabiji kechi bakokejile byambo bya Yesu ne.

## LABIJILAI UNO VELESHI

**“Kabiji mwikale ba kwioba mambo, kechi ba kwiomvwatu ne kwijimbaika anwe bene ne.”** –Yakoba 1:22

## KIBABA 11. MWELA NE KIZHIBA BIKOKELA YESU



Mateo 8:23-27

**23Kabiji pa kuya mu bwato, bana banji ba bwanga bamulon-**

dele. **24Kabiji ponkapo, pabukile kipupu kikatampe pa kizhiba, kya kuba ne bwato ke bulobe na manyaki: pakuba aye mwine wajinga mu tulo.** **25Kabiji baishile ko aji, ne kumubusha bamubusha’mba, Nkambo, tupulushai; twavila.** **26Kumvwa aye amba, Muchiina ka? anweba ba kalwitabilo kacheche. Ponkapo waimene, ne kukanya lubesha ne mema; ponkapo paubile ne nzo!** **27Ne abo bakuminye’mba, Au mutnu, ñanyi musango, ye obatu lubesha lwamukokela, ne mema?**

## KIPUPU PA KIZHIBA


Yesu ne bana banji ba bwanga bajinga mu bwato bukatampe pa mema. Yesu wakokele kabiji wajinga mu tulo. Byo alajile, pabukile kipupu kikatampe, kya kuba ne bwato ke bulobe na manyaki. Bana ba bwanga bayujilwe na moyo; onka ma-mbo, bamubushile Yesu. Kampe Yesu wakuminye pa kumona’mba bana ba bwanga bakwachilwe na moyo Yesu saka aji nabo. Bino byo amwene lwitabilo lwabo lo lwajinga luchiche,

waimene ne kukanya lubesha ne mema. Ponkapo paubile ne nzo. Bana ba bwanga bayukile'mba Yesu wajinga muntu wapusana na bonse bakwabo. Kine, uno muntu wajinga Mwana Lesa! Pano ne mwela ne kizhiba byamukokejile.

## BIMO BYA KUVULUKA

Kala inanji ne bana banji ba bakazhi babiji bajinga mu bwato bukatampe mu kizhiba kikatampe. Kimo kyamwekele ku bwato kabiji bwato bwatendekele kwibila. Bantu bamo bakwachilwe na moyo, bino uno inanji ne bana banji babiji bamutemenwe Yesu ne kumuketekela. Kana mwayuka byaambile mwana mubejinyi? Waambile kwi inanji amba, "Mama, kizhiba kyo kyanji, mambo Lesa wikilengele; onkao mambo, kechi tuchina kwibila ne, mambo kechi twakonsha kufumya mu kulumwina kwa Lesa ne." Na bilungi byamwesheshe luketekelo basambakene lufu mu kizhiba kyazhika. Vulukai kino, mulunda nami wa butemwe, amba, "KAFWAKO KYAKONSHA KWI-TUKOZHA NE, YESU BYO TUJI NANJI."

## KIBABA 12. TWAFWAINWA KUBULA BAKWETU MAMBO A YESU



Mateo 10:28-33

<sup>28</sup>Abo bepáya mubiji ne kunkalwa kwipaya mweo kwibachina ne: muchinai aye wakonsha konauna ne mweo ne mubiji pamo mu Ngehena. <sup>29</sup>Le-

lo tuñonyi tubiji ke bapota na kangwee kamo nenyi? kabiji nangwa kamo kakapona panshi pabula kwitaba Shenu ne: <sup>30</sup>kabiji nangwa nsuki yenu ya ku mitwe, yonse beibala. <sup>31</sup>Byonkabyo kechi muchine ne: mambo mwibakila bañonyi bavulá mu kunema. <sup>32</sup>Byonkabyo awa ukangitába ku meso a bantu, ne amiwa nkamwitaba ku meso a Tata wa mwiulu. <sup>33</sup>Kabiji awa ukankána ku meso a bantu ne aye naye amiwa nkamukana ku meso a Tata wa mwiulu.

## KITUFWAINWA KUSHIMUNA YESU

Yesu Kilishitu witulaya'mba umvwe twamwitaba ku meso a bantu, ne aye Yesu uketwitaba ku meso a Lesa wa mwiulu. Kino kyawama bingi. Kushimuna Yesu ko kuba'mba kumwesha Yesu mu byubilo byetu ne mu ñambilo yetu. Ne obewa, ubenakwibabula bakwenu mambo a Yesu ne bulume bwanji bukatampe bwakonsha kwitupulusha na bubinyi? Ubenakwibabula bakwetu mambo a byo akubila Yesu mu kukupulushanyi? Bino byo bimo byo twafwainwa kuba umvwe twasa-ka kushimuna Yesu ku meso a bantu.

Nangwa byonkabyo, umvwe tumvwa bumvu mambo a Yesu, kabiji kechi tumushimuna ne, kabiji tukankalwa kuba byo asaka, pano tubenakukana Nkambo yetu ku meso a bantu. Kyo kintu kyakosa kabiji kileta bulanda mu muchima wa Yesu. Twafwainwa kulomba lulekelo Iwa mambo kwi Yesu ne kumuketekela kwitukwasha kuba abya bintu bimutokesha pa muchima. Onkao mambo, tukabula kuyuka byo aambil Yesu pa kwamba'mba: Ne amiwa nkamukana ku meso a Tata wa mwiulu.

## KECHI TWAFWAINWA KUCHINA BANTU NE

Bantu bamo batama bingi. Boba bintu byakatazha. Bimye bimo bepaya bantu. Bino bakonsha kwipaya mubiji yenka; kechi bakonsha kwipaya mupashi ne. Mupashi kyo kibese kya muntu kechi kifwa ne. Mubiji byo ufwu, mupashi ubwela kwi Lesa ye umupana kwi atweba. **“Kabiji byonka byo ebato-ngwela bantu kufwa jimo jonka, kabiji palutwe ke kuya ku kije”** (Bahebelu 9:27). Obewa ne amiwa pamo tukeambila mambo kwi Lesa. Loma 14:12 waamba'mba, **“Kabiji atweba bonsetu umo umo tukeambila mambo kwi Lesa.”** Lesa ye yenka ye twafwainwa kuchina. Monai Musapwishi 12:13, 14. **“...Akamwai Lesa ne kulama mikambizho yanji; mambo kyo kyonka kyafwainwá kuba bantu. Mambo Lesa**

**ukaleta byubilo byonse bya bantu mu kije, ne bintu byonse byafyamiká nabyo pamo, nangwa byawamá, nangwa byatamá.”**

Lesa waamba’mba kechi twafwainwa kuchina byo bakonsha kwitubila bantu ne. Bakonsha kwamba bubela bwatama mambó a atweba; bakonsha kwitukozha; bakonsha kwitwipaya, bi-no Lesa waamba’mba kitufwainwa kumuketekela. Lesa wayuka byonse! Wakonsha kubala nsuki yetu ya ku mutwe. Lesa wayuka byonse! Wayuka kañonyi kacheche byo apona pansi. Atweba twakila bañonyi bavula ku kunema. Kechi wakonsha kwituvulula ne. Mu Bahebelu 13:5 Lesa waamba’mba, “...Kechi nkakushe nangwa kachechetu ne, ne kukulekelela nangwa kachechetu ne.”

## KIBABA 13. KISHIMPI KYA NJIMI WAKUSHILENGA NKUNWA



Mateo 13:1-9 ne 18-23

**<sup>1</sup>Mu jonkaja juba Yesu pa kulupuka mu nzubo, wakekajile ku kibumbu kya kizhiba. <sup>2</sup>Kabiji kwamupwijile mabumba aka-tampe, kepo ayile mu bwato, waikale monka; ne mabumba**

onse sa aimana kungye. <sup>3</sup>Ne aye wibambijile mambo avulá mu bishimpi amba, Talai! njimi walupukile na kukusa nkunwa; <sup>4</sup>kabiji pa kukusa, nkunwa imo yaponene pa jishinda, ne bañonyi baiya, baja: <sup>5</sup>kabiji imo yaponene pa bibangabwe, pabulá kuzhika mushiji: ponkapo ne kumena yamenene, mambo a mushiji wavula kafwako: <sup>6</sup>ne pa kusama juba, yasokelwe; ne mambo a kubula kwikizha mi-zhazhi, yaumine. <sup>7</sup>Ne ikwabo yaponene mu miba; ne miba yakomene ne kwiitatankanya: <sup>8</sup>pa-kuba ikwabo yaponene mu mushiji wawamá, ne kusema yasemene, imo yasemene kitota, imo

yasemene makumi atanu na jimo,  
imo yasemene makumi asatu.  
<sup>9</sup>Awa ují na matwi a kumvwa,  
omvwe.

<sup>18</sup>Umvwai kabiji kishimpi kya njimi. <sup>19</sup>Umvwe muntu wau-mvwa mambo a bufumu, ne kwia-kwatakanya ne, ponkapo awa mubi waiya, ne kumusopolao akushiwá mu muchima wanji. Uno ye yewa wakushiwá nkunwa ya pa jishinda. <sup>20</sup>Ne awa wakushiwá nkunwa ya pa bibangabwe, ye yewa waumvwá mambo, ponkapo wiatambula ne kwiasi-kelela; <sup>21</sup>nanchi ka aji na mu-zhazhi monka mwanji ne, wako-

selamo pacheche; kabiji pa kubuka bya lumanamo nangwa bya lupato pa ano mambo, ponkapo wituntula. <sup>22</sup>Ne awa wakushiwá nkunwa ya mu miba, ye yewa waumvwá mambo, kabiji bya kutabataba bya panopantanda, ne bujimbijimbi bwa bunonshi, byaipaya mambo, ne kupanga ke ne. <sup>23</sup>Kabiji awa wakushiwá nkunwa ya mu mushiji wawamá, ye yewa waumvwá mambo, ne kwia-kwatakanya; ye upanga bipangwa kine, umo upanga kitota, umo upanga makumi atanu na jimo, umo upanga makumi asatu.

## KISHIMPI KYO KI KA?

Kishimpi kyo kishimikizho kicheche kyakonsha kusolola kya bukine kyanema.

### BYA KUBA

A. Munshi muji byanembwa byashalapo byambo bimo. Tangai kibaba jibiji ne kunemba byambo byafwainwa. Kitanshi kyaubiwa mu kukukwasha.

1. Nkunwa yaponene pa jishinda yajilwe na \_\_\_\_\_.
2. Nkunwa yaponene pa bibangabwe kechi yajinga \_\_\_\_\_ wavula ne; onkao mambo pa kusama juba \_\_\_\_\_, kabiji mambo a kubula kwikizha mizhazhi \_\_\_\_\_.
3. Nkunwa yaponene mu miba, ne \_\_\_\_\_ yakomene ne kwiitatakanya.
4. Nkunwa yaponene mu mushiji wawama ne kusema yasemene \_\_\_\_\_ byavula.

## KULUMBULULA KWA KISHIMPI

B. Tangai kibaba jibiji ne kumona kulumbulula kwa kishimpi. Nembai byambo byafwainwa mu mapunzha abulapo byambo. Kitanshi kyaubiwa mu kukukwasha.

1. Nkunwa yaponene pa jishinda yapashānanya bantu baumvwa byambo bya bufumu bwa Lesa, bino kechi \_\_\_\_\_ ne. Pano aye mubi waiya ne kusompola bukine bwakushiwa mu michima yabo.

2. Nkunwa yaponene pa bibangabwe yapashañanya bantu baumvwa \_\_\_\_\_ ne kwibitambula na lusekelo. Bino mambo kechi muji mpunzha ya mu michima ya byambo bya Lesa ne, byambo kechi byakonsha kwikala na mizhazhi yavula ne. Kabiji pa kubuka bya lumanamo nangwa bya lupato, ponkapo \_\_\_\_\_.

3. Nkunwa yaponene mu miba yapashañanya bantu baumvwa byambo bya Lesa, bino bya kutabataba bya \_\_\_\_\_ nobe bya nzubo nangwa bya busulu nangwa kukebakeba lusekelo, byaipaya byambo. Bunonshi bya ino ntanda ibajimbaika bantu ne kutatankanya \_\_\_\_\_, kabiji ne \_\_\_\_\_ ke ne.

4. Nkunwa yaponene mu mushiji wawama yapashañanya bantu baumvwa byambo bya Lesa ne kwibikwatakanya. Bebitambula mu michima na lusekelo kabiji batwajijila kubika Lesa ke mutanshi mu bwikaloo bwabo. Makatazho ne lumanamo kechi byakonsha kwibalengela kufuma kwi Lesa ne. Kechi baswisha makatazho a pa juba pa juba kutwela ne kwibatatakanya ne, kabiji kechi batesha michima ku bunonshi ne. Babuka ne kukenkenta saka balomba ne kuketekela Lesa kwibakwasha. Onkao mambo bapanga \_\_\_\_\_ kine, umo upanga kitota, umo upanga makumi atanu na jimo, umo upanga makumi asatu.

# JIPUZHO — OBEWA WI ÑANYI MUTUNDU WA MUSHIJI?

Umvwe obewa kechi uji pamo nobe mushiji wawama wata-mbula nkunwa yawama ne, yanga kwi Nkambo Yesu mu milo-mbelo ne kumuswisha kutwela mu muchima wobe ne mu bwi-kalo bobe. Aye wakonsha kukukwasha kupanga bipangwa byavula.

## KIBABA 14. MUSALABU NE MUNCHINYA



Mateo 16:24-28

**24**Ponkapo Yesu wibambile ba-na banji ba bwanga'mba umvwe muntu wasaka kundondela, eka-

ne mwine, ashikule musalabu wanji, andondelenga. **25**Mambo aye wasaka kupulusha mweo wanji ukamataya: pakuba awa ukantayila amiwa mweo wanji, ukamumona. **26**Lelo ukajilamo ka muntu nangwa ukanonka ntanda yonse umvwe wataya mweo wanji? nangwa i ki ka kyo aka-pana muntu kya kupimpula na mweo wanji? **27**Mambo Mwana muntu ukeya mu lukumo lwa Shanji na bamalaika banji; po po akafweta ku muntu ku muntu monka mwayila mingilo yabo. **28**Kine nemwambila namba, po baji bamo baimana pano, kechi bakamona lufu nangwa pacheche ne, poso bakamone Mwana muntu kasa eya mu bufumu bwanji.

## MUSALABU WA BANTU BONSE

Inge twasaka kulondela Yesu twafwainwa kuswa kwikana atwe bene ne kushikula musalabu ye witufukwijile Yesu. Yesu uji na musalabu ye twafwainwa kushikula obewa ne amiwa. Washile lukumo lwanji lonse mwiulu ne kwiya panopantanda mu kwitupulusha ku lufu ne Ngehena ne kilende. Waswile ku-



manama kya kine na mambo a atweba. Bahebelu 12:2 witubula'mba Yesu, "wakosejilemo mu kumanama ku musalabu mambo a lusekelo Iwamutujlwé kulutwe, ne kutako muchima ku bumvu ne, kabiji pano waikala konka ku kilujo kya jitanda ja Lesa." Ee kine, Yesu wabwelele mwiulu mo muji lukumo ne lusekelo. Witukebelo obewa ne amiwa

kwiya ne kwikala nanji. Mu Yoano 14:3 Yesu witubula'mba, "**Kabiji inge naya na kwimumwena kuntu, nkeya jibiji, ne kwimutambula kwami ami mwine; namba akwa ko nji amiwa, ne anweba mukekale konka.**"

Kwikanya ko kuba'mba ka? Ko kuswa kwikala kwa kubula kuba bintu mu kuba'mba bakwabo bakonshe kwikala na kintu kikwabo kyakila mu kunema. Kampe Yesu wakonsha kukukebelo kupana mali obe mu kuba'mba bantu babula kumvwa Mambo Awama a Yesu bakonshe kwiomvwa. Kampe wakonsha kukukebelo kwikala kwa kubula kajo kimye kimo mu kuba'mba mutaye kimye mu kumulombela umo wabula kwitabila nangwa umo wakolwa bingi. Kampe wakonsha kukukebelo kukana kupota kintu kyo wasaka mu kuba'mba ukwashe bayanda ne bafwa na nzala. Kampe Yesu wakonsha kukukebelo kuya ku mpunzha imo mu kubula bantu mambo a Yesu. Bimye bimo witukebelo kulama bana bacheche babula bansemi ne kwi-baleta mu mazubo etu mu kuba'mba twibalame bulongo. Ko aji mashinda avula apusana-pusana mo twakonshesha kwikanya atwe bene mu kukwasha bakwetu.

## MUPASHI WOBE WANEMA KUKILA BYA PANOPANTANDA

Inge waingila ne kwingila kanatu wajinga munonshi mukatampe wakila muno mu ntanda, bino kechi watemwa ne kulo-

ndela Yesu ne, kechi wamuketekela Yesu ke Mupulushi wobe ne, nanchi wi kilubi kya kine. Mupashi wobe watayiwa! Kafwako kyawama kya panopantanda kyakonsha kwimukwsa ne, inge wataya bumi bwa myaka! I ki ka kyo akapana muntu kya kupimpula na mweo wanji? Muntu umo wasakile kutokesha bantu ne kisemi pa muchima kukila na byo asakile kutokesha Lesa pa muchima. Mu jino jishinda wapimpwile mupashi wanji na lutotelo lwa bantu. Kafwako byawama na ngwa milambu bya panopantanda byapanwa na bantu batama byaesakana na munema wa mupashi wa muntu ne. Kechi twafwainwa kuba kintu kyakonsha kwitufumya kwi Nkambo Yesu Kilishitu ne.

### BYA KUBA

**Labijilai uno veleshi: “Mambo Mwana muntu ukeya mu lukumo lwa Shanji na bamalaika banji; po po akafweta ku muntu ku muntu monka mwayila mingilo yabo.”**

—Mateo 16:27

### KIBABA 15. YESU WATEMWA BANA BACHECHE



Mateo 18:10-14

**<sup>10</sup>Jimukai!** kechi musule na ngwa kamotu ka tuno tuchehe ne: mambo nemwambila namba, bamalaika bato bají mwiulu bakelwa kutala pa kilungi kya Tata wa mwiulu. **<sup>11</sup>Mambo Mwana**

muntu waiya’mba, Mpulushe balubilamo. **<sup>12</sup>Anweba mulangu-luka’mba ka?** Kana muntu uji na mikoko makumi jikumi, palubapo umo, kechi ashe yoya iji makumi atanu na ana ne itanu na ina, kaye mu mitumba na kukeba yewa umo walubapo ne-nyi? **<sup>13</sup>Kabiji umvwe wamumona,** kine nemwambila namba, wamusekelela bingi kukila kusekela kwa yoya ikwabo iji makumi atanu na ana ne itanu na ina yabulá kuluba. **<sup>14</sup>Mo mwaya ne muchima wa Shenu wa mwiulu,** kechi usaka nangwa kamotu ka tutu tucheche konaike ne.

## KINO KIBABA KITUFUNJISHA KA?

1. Bana bacheche baji na bamalaika babo. Bano bamalai-ka bakelwa kutala pa kilungi kya Lesa mwiulu. Onkao mambo, tujimuke byo tuba na mwana mucheche. Kitufwainwa kukwasha mwana kuba byawama.
2. Mwana muntu jo jizhina jikwabo ja Yesu Kilishitu, Mwana Lesa. Bimye bimo watelwa’mba Mwana muntu mambo wase-menwe kwi Maliya, mwanamukazhi wabula kusambakanapo na mwanamulume; kabiji bimye bikwabo watelwa’mba Mwana Lesa mambo Lesa ye Shanji.
3. Ene mambo Kilishitu o aishiile panopantanda o a kupulusha balubilamo.
4. Muntu byonka byo ayile na kukeba mukoko umo walubilemo, ne Yesu Kilishitu naye waishile mu kwitukeba ne atweba.
5. Muntu byonka byo asekejile pa kumona mukoko walubilemo, ne Yesu Kilishitu naye usekela byo tumuswisha kwitupulusha.
6. Yesu wasekela kyakila byo atana mwana mucheche wawama wa luketekelo waitabila mwi Aye. Kechi wasakile na-ngwa umo wa mu bano bana bacheche kulubilamo ne. Wasaka’mba bonse bapuluke.
7. Kino kitumwesha buneme bwa kufunjisha bana mambo a Yesu ne kwibatangijila kwi aye Yesu.

## KIMO KYA KULANGULUKAPO

**Jipuzho:** Ki ka kikamwekela muntu waeseka kumukanya mwana kumwitabila Nkambo Yesu Kilishitu?

**Mukumbu:** Yesu waamba mu Mateo 18:6 amba, “**Pakuba awa ukekatuntwisha kamo ka tonka tuno tucheche twanxitabilá, kyamufwainwa aye kumukuchila jibwe jikata-mpe ja kuperapo mu nshingo yanji, akebile najo mu kizhiba.**”



Mako 10:13-16

<sup>13</sup>Kabiji bamuletejilenga bana bacheche, amba, bebabike makasa: ne bana ba bwanga bebaka-

inye. <sup>14</sup>Pakuba Yesu byo ekimwe-ne, wafichile ku muchima, ne kwibambila'mba, Balekai bana bacheche beye kwi amiwa; ne kwibakanya ne; mambo bufumu bwa Lesa bo bwa bonkaba bana. <sup>15</sup>Kine nemwambila namba, Awa ukabulá kutambula bufumu bwa Lesa pamo ne mwa-na mucheche, kechi ukatwelamo nangwa pacheche ne. <sup>16</sup>Ponkapo aye wibatambwile mu maboko anji, ne pa kwibabika makasa anji, wibapesheshe.

## KIBABA 16. TWAFWAINWA KWIBALEKELA MAMBO BAKWETU



Mateo 18:21-35

<sup>21</sup>Ponkapo Petelo waishile ko aji amba, Nkambo, kana mulo-ngo wambala mambo amiwa na-mulekela jinga? jitanu na jibiji-

nyi? <sup>22</sup>Kumvwa Yesu amba, Ke-chi nkubule jitanu na jibiji ne; poso pa makumi atanu na abiji ne jitanu na jibiji. <sup>23</sup>Onkao mambo bufumu bwa mwiulu bwa-pashañana pamo na mfumu umo, wasakilé kubalulula bya baka-lume banji. <sup>24</sup>Kabiji byo atatwi-le kwibibalulula, umo bamulete-le kwi aye, wizhikijilé biumbi ji-kumi bya matalenta. <sup>25</sup>Kabiji byo abujile bya kupanunwinamo, nkambo yanji wakambizhe'mba, bamupotetu, ne mukazhanji pa-mo, ne bana, ne byonse byo aji na-byo, apane. <sup>26</sup>Ponkapo kalume wanji wamulambile panshi, ne

kumupopwela’mba, Nkambo, bakintekele muchima, nkemupa byonsetu, shata.<sup>27</sup>Ponkapo nkambo ya yewa kalume wamubile lusa, wamukasulwile, ne kumulekela ne byo ezhikijile ke byatu.<sup>28</sup>Pa kulupuka, awa kalume wataine mukwabo kalume, wizhikijilé kwi aye makumi jikumi a ndenali: ponkapo wamukwachile ne pa kikolomeno, amba, Mpene aya yo wizhikijile.<sup>29</sup>Ponkapo kalume mukwabo kamulambile pansi ne kumusashijila’mba, Mwane, bakintekele muchima, nkemupa.<sup>30</sup>Kabiji aye ka aswile ne: wakamutayile ne mu kaleya amba, poso apane byonse byo ezhikijile.<sup>31</sup>Ba-

kalume bakwabo, pa kumona byo auba, baubile bingi bulanda, bakamubujile ne nkambo yabo byonsetu byo aubile.<sup>32</sup>Ponkapo nkambo yanji wamwichile, mwambile’mba, Obewa kalume watama, obewa nakulekele byonse byo wizhikijile, byo wansashijile:<sup>33</sup>lelo obewa kechi wafwainwa kumubila lusa mukwenu pamo byonka byo nakubijile lusa amiwa nenyi?<sup>34</sup>Ponkapo nkambo yanji ke bukaji, wamupaine ku bakabísha, poso akapane tu byonse byo ezhikijile.<sup>35</sup>Monka mo akemubila ne Tata wa mwiulu kana ne kwibalekela balongo benu mambo abo mu michima yenu ne.

## KINO KIBABA KITUFUNJISHA BINTU BYAVULA

1. Byambo bya “makumi atanu na abiji ne jitatu na jibiji” bilumbulula’mba lulekelo lwa mambo lwetu kechi lwafwainwa kuleka ne.
2. Kalume wakongwele ku mfumu biumbi jikumi bya matale-nta wajinga na nkongole ikatampe. Talenta umo wajinga na mutengo mukatampe, kabiji uno muntu wakongwele biumbi jikumi. Kyakosele bingi kupwisha ino nkongole.
3. Kalume byo alombele butekanye kwi mfumu amba akonshe kumupa byonsetu, nanchi mfumu wamwesheshe butemwe bukatampe ne lusa lukatampe mu kwibalekelako nkongole yonse.
4. Uno kalume wamwesheshe’mba wabula lusanchilo na mambo a kino kintu kya lusa byo ayile ne kukambizha kalume mukwabo kubwezha bicheche byo akongwele. Makumi jikumi

a ndenali kechi mali avula ne. Wabujile bukishinka byo amukwachile ne kukeba mali anji. Lesa utala pa byubilo byetu byonse kabiji wamwene'mba uno kalume mutanshi kechi wamubile byawama kalume mukwabo aye mfumu byonka byo amumwesheshe butemwe ne lusa ne.

5. Uno kalume mutanshi kechi waswile kumvwa kulomba kwa myanji ne, kabiji wamutayile mu kaleya poso amba apane byonse byo akongwele. Inge wakankelwe kupana mali byo abujile kwikala mu kaleya, nanchi wakonsheshe kupana byepi saka aji mu kaleya?

6. Kino kintu kyatama kyafikile ku matwi a mfumu. Kyamulenjejile mfumu kuzhingila mambo wamwene'mba uno kalume kechi wajinga na lusanchilo byo atambwile lulekelo lwa mambo ne. Uno kalume wafwainwe kuswa kulekela mambo bonse bamukongwejile mali anji.

7. Mambo a kubula kulekela mambo, uno kalume watama watayilwe mwine mu kaleya, kabiji bamukabishe poso aka panetu byonse byo akongwele kwi aye mfumu.

8. Yesu waamba'mba: "Mo monka mo akemubila ne Tata wa mwiulu kana ne kwibalekela balongo benu mambo abo mu michima yenu ne."

9. Byambo bya Lesa bitubula mu Loma 3:23 amba. "**Mambo bonse balenga mambo, kabiji bapelelelatu ne kufika ku lukumo lwa Lesa ne.**" Kechi twakonsha kulipila malipilo lwa bubi ne, mambo twabula koloka ku meso a Lesa. Bino aye Yesu, Watoka Wazhila, waishile mu kulipila malipilo a mambo etu byo afwile pa musalabu. Witukasulwile! 1 Yoano 3:5 witubula'mba, "**Kabiji anweba mwayuka'mba aye wamwekele mu kufumya mambo; ne mwi aye kechi muji bundengamambo ne.**"

10. Onkao mambo, Lesa byo etulekejile mambo etu mambo a Yesu ne kwiafumya onse, witukebelo ne atweba kwibalekelako bakwabo mambo abo. Byo tulekelako bakwabo mambo

abo, tumwesha kwi Lesa amba michima yetu yayulwa na lusanchilo mambo aye Lesa witulekelako mambo etu onse ne kukasulula witukasulula.

## BIMO BYA KUVULUKA



Kubwezha kyatama umvwe mukwetu witubila kyawama kyo kyatama; bantu bavula babwezha byawana umvwe bebobila byawama; bino ku-bwezha byawama na byatama ko kupashañana nanji Nkambo Yesu Kilishitu. Yesu walombejile balwanyi banji; kabiji wibalombejile abo bamulengejile kumanama. Mu

Luka 23:34, tutanga milombelo ya Yesu: “...**Tata! mwibalekele mambo; mambo kechi bayuka kyo boba ne.**”

## KIBABA 17. MUNONSHI UJI NA BULANDA



Mateo 19:16-26

**<sup>16</sup>Kabiji ponkapo, muntu waishile ko aji, amba, Mufunjishi, i**

ki ka kyawamá kyo nsakuba, namba, mmone bumi bwa myaka? <sup>17</sup>Kumvwa aye amba, Mambo ka mwangipuzha kyawamá? Ko aji umotu wawamá: kabiji umvwe mukeba kutwela mu bumi, mulame mikambizho. <sup>18</sup>Ne aye wamwambile'mba, Ñanyi mikambizho? Kumvwa Yesu amba, Kwipayañana ne, Kuba bukende ne, Kwiba ne, Kwibabepela bantu ne, <sup>19</sup>Unemeke bashobe ne bainobe; kabiji, Utemwe mukwenu byonka byo

witemwa obe mwine. <sup>20</sup>Nsongwalume wamwambile’mba, Abyo byonse nebilama: kyo nabulwa i ki ka? <sup>21</sup>Yesu wamwambile’mba, Umvwe musaka kulumbuluka, kapotololai byonse byo muji nabyo, ne kupa na ku bayanji, kabiji mukakala na nsabo mwiulu: kabiji bino mwiye, mundondele. <sup>22</sup>Nanchi nsongwalume pa kwikyuvwa, kaye ne kuya ne ku muchima bwi! Mambo wajinga na nsabo yavulá. <sup>23</sup>Ponkapo Yesu wibamble bana banji ba bwanga amba,

kine nemwambila namba, Kyakatazha munonshi kutwela mu bufumu bwa mwiulu. <sup>24</sup>Kabiji nemwambila jibiji namba, Ngamelia kupita mu jiso ja nguya kyapélako, kechi kyakatazha pamo ne munonshi kutwela mu bufumu bwa Lesa ne. <sup>25</sup>Kabiji bana banji ba bwanga pa kwikyuvwa, bakuminye bingi, amba, Nanchi wayuka kupuluka nãnyi? <sup>26</sup>Kabiji Yesu pa kwibatala, waambile’mba, Ku bantu kechi kikonsheka ne; pakuba byonse byakonsheka kwi Lesa.

#### BYA KUBA

A. Nembai mikambizho itanu Yesu yo abujile munonshi kula-ma.

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_
5. \_\_\_\_\_

B. Kumbuai ano mepuzho na EE nangwa INE. Inge mukumbu ye “ee,” pano nembai “ee”. Inge mukumbu ye “ine,” pano nembai “ine”.

1. Uno nsongwalume waambile’mba nalamine ino mikambizhoyonsenyi? \_\_\_\_\_
2. Kana Yesu waambile’mba inge uno nsongwalume wasa-

ka kulumbuluka, wafwainwa kuya ne kupotesha byonse byo aji nabyonyi? \_\_\_\_\_

3. Uno nsongwalume wafwainwa kupana mali anji ku banonshinyi? \_\_\_\_\_

4. Yesu wamwipwizhe uno nsongwalume kwiya ne kumu-londelanyi? \_\_\_\_\_

5. Uno nsongwalume walondejile Yesunyi? \_\_\_\_\_

6. Uno nsongwalume wafumineko na lusekelonyi? \_\_\_\_\_

## KIBABA 18. KILISHITU WIBABUJILE JIMO BANA BANJI BA BWANGA MAMBO A BIKAUMWEKELA



Mateo 20:17-19

<sup>17</sup>Kabiji Yesu byo ayilenga ku Yelusalema, wapatwileko ba jikumi na babiji, ne kwibambila mu jishinda amba, <sup>18</sup>Talai, tube-nakuya ku Yelusalema; kabiji Mwana muntu bakamusolola ku bañanga bakatampe ne ku ba-

nembeshi; ne abo bakamufwi-sha nao a lufu, <sup>19</sup>kabiji bakamu-fikizha ku Bagentila, ne abo na-bo bakamubila mwenga, ne ku-mututaula, ne kumupopa pa mu-salabu: kabiji mu juba ja bu-satu ukasangulwa.

LUFU LWA YESU KECHI LWAJINGA LWA MAPUSO NE

Bantu batama saka bakyangye kumupopa Kilishitu pa musalabu, Yesu wibabujile bana banji ba bwanga bikamu-

mwekela. Lufu Iwanji lwa pa musalabu lwajinga kibese kya kufukula kwanji kwa kwitupulusha ku bubi bwetu. Yoano 3:14, 15 witubula'mba: “**Kabiji byonka byaimikilé Mosesa mulolo mungyetu, byo kyafwainwa ne Mwana muntu akemikwe byonkabya; amba bonse bamwitabila bekale na bumi bwa myaka.**” Atweba bonse twafwainwa kwikala na michima yayula lusanchilo mambo a kuyuka'mba Yesu witufwijile. Mutundu wa kikoba kyetu nangwa kyallo kyo twaikalamo kechi byanema ne. **YESU WIBAFWIJILE BANTU BONSE.** Monai 2 Kolinda 5:15.

Kyambo kya “**bonse**” kitongola obewa ne muntu yense waitabila! Inge OBEWA waitabila'mba Yesu Kilishitu wafwile pa musalabu mu kupulusha OBEWA mu bubi bobe, pano OBEWA ukekala na BUMI BWA MYAKA!

“Lesa byo ebatemwisha ba panopantanda,  
wapaine Mwananji yenkawa umo....”

—Yoano 3:16

## KIBABA 19. YESU BAMUKWACHILE

Mateo 27:11-26

<sup>11</sup>Kabiji Yesu waimene ku meso a mwine ndamakyalo; kepo mwine ndamakyalo wamwipwizhe'mba, Obewa wi mfumu wa Bayudeanyi? Kumvwa Yesu amba, Mwfakilapotu. <sup>12</sup>Kabiji byo bamushinawine ku bañanga bakatampe ne bakulumpe, wazhindaminepotu. <sup>13</sup>Ponkapo Pilato wamwambile'mba, Ka waumvwa byavulá byo babenakukushinawina nenyi? <sup>14</sup>Kabiji aye ne kumukumbulapotu nangwa kakya-

mbo kamotu ne. Onkao mambo mwine ndamakyalo wakuminye bingi. <sup>15</sup>Kabiji mu moba a kijilo mwine ndamakyalo wakelelwenga kwijikasulwila jibumba kali umo, ye basakile abo bene. <sup>16</sup>Kabiji bajinga na kaili ye bayukile ku bonse, jizhina janji Balabasa. <sup>17</sup>Kepo byo bapwijile pa-mo bonse, Pilato wibambile'mba, Mwansaka nemukasulwile ñanyi, Balabasanyi, inyi Yesu, ye batela'mba, Kilishitu? <sup>18</sup>Mambo aye wayukile'mba, Mambo a kichima o bamusolwela. <sup>19</sup>Kabiji



byo aikele pa kipona kya kije, mukazhanji watumine jiwi kwi aye amba, Mumuleketu ao mutu waoloká; mambo lelo namulabukila byatamá byavulá.<sup>20</sup> Kabiji bañanga bakatampe ne bakułumpe bebaswisheshe mabumba'mba, Tulombai Balabasa, Yesu tumonaune.<sup>21</sup> Kabiji mwine ndamakyalo wibepwizhe'mba, Ñanyi wa mu bubiji bwabo ye musaka nemukasulwile? Kumvwa abo amba, Balabasa!<sup>22</sup> Pilato wibambile'mba, Nanchi i ki ka kyo nsakumuba Yesu, ye batela'mba, Kilishitu? Kumvwa bonse amba, Bamupope ku musalabu.<sup>23</sup> Kumvwa aye amba,

Nanchi, lelo kyabipá kyo auba i ki ka? Kepo babijikishe bingi kyakilá amba, Bamupope ku musalabu.<sup>24</sup> Kabiji Pilato, pa kuyuka'mba, Kechi namona mwa kwibakanyinya ne, kabiji kiwo-wo kikatampe ke kibuke, wata-mbwile mema, ka owe ku maboko ku meso a jibumba, amba, Nefungako mu ano mashi a aye'-we, mutu waoloká; mambo enu anwe bene.<sup>25</sup> Kabiji bonse bantu baitabile'mba, Mashi anji etushinkamane atweba ne bana betu.<sup>26</sup> Ponkapo wibakasulwijile Balabasa; pakuba Yesu, wamututawile, ne kwibapa aye amba, Bamupope ku musalabu.

## BYA KUBA

Pa peji 41 kulutwe muji mepuzho akonsha kukumbulwa kufuma biji mu Kibaba 19. Tangai kibaba jibiji, pano kumbulai mepuzho.

1. Byo bamushinawine Yesu ku bañanga bakatampe ne bakulumpe, Yesu kechi waambile \_\_\_\_\_ ne.
2. Kino kyamulengele mwine ndamakyalo kukumya \_\_\_\_\_.
3. Balabasa wajinga jizhina ja \_\_\_\_\_.
4. Pilato wamukasulwile ñanyi ku bantu? \_\_\_\_\_
5. Bantu babijikile'mba bamupope Yesu ku \_\_\_\_\_.

## KIBABA 20. MUNCHINYA WA MIBA WAPAINWE KWI YESU

Mateo 27:27-30

<sup>27</sup>Ponkapo bashilikale ba mwine ndamakyalo, bamutwajile Yesu mu kipango kya ndamakyalo, ne kukungulula ko aji bonse ba mu kiombe kyabo. <sup>28</sup>Kabiji bamuvujile bivwalo byanji, ne kumuuvwika kivwalo kyachijisha. <sup>29</sup>Kabiji balukile munchinya wa miba ne kumuuvwika ku mutwe wanji, ne jitete mu kuboko kwanji kwa kilujo; kabiji bamufukaminenga pansi, ne kumwendeleka'mba, Mutende, Mfumu wa Bayudea! <sup>30</sup>Kabiji bamushipile mate, ne jitete bamwangachilejo ne kumupumajo mu mutwe.



### YESU BAMUBILE KA?

Bantu batama bamubile Kilishitu bintu byatama. Kabiji ne atweba twafwainwa kuketekela kumanama mambo a Kilishitu. Bantu batama kechi batemwa Lesa ne. Kechi batemwa Yesu Kilishitu ne, kabiji kechi batemwa bantu basa-

ka kwikala bwikal bwawama ne. Yesu witubula pa mambo a kino mu Yoano 15:18-20:- “**Inge kabiji ba panopantanda bemushikwa, mwayuka’mba, babangijile kunshikwa amiwa.** Inge mwaji ba panopantanda inge ba panopantanda bemutemwa, mambo batemwa babo bene: pakuba anweba byo mwabula ba panopantanda, ne amiwa ne-musalulula mu ba panopantanda, ba panopantanda bemushikwa. Vulukai byo nemwambile namba, **Muzha kechi wakila nkambo yanji ne.** Inge bampachile amiwa, **kabiji bakemupata ne anweba....**” Yesu uji na byambo byawama bya kwitushilañana mu Yoano 16:33, “**Bino bintu nemwambila namba mumwene mutende mwi amiwa.** Panopantanda kumanama ko kwenu: **byonkabyo kose-shai michima yenu; amiwa nepashinda panopantanda.**”

### BYA KUBA

Ino mikumbu yakonsha kukumbulwa mu Kibaba 20. Tangai kibaba jibiji, pano kumbulai mepuzho.


1. Bashilikale bamuvujile Yesu bivwalo byanji ne kumuwwika kivwalo \_\_\_\_\_.
2. Balukile munchinya wa \_\_\_\_\_ ne kumuwwika ku \_\_\_\_\_.
3. Bamwendelekele Yesu byo bamufukaminenga pansi ne kwamba’mba, Mutende \_\_\_\_\_ wa Bayudea.
4. \_\_\_\_\_ mate ne kumupumajo mu mutwe na \_\_\_\_\_.

### KIBABA 21. BAMWIPAYA YESU

Mateo 27:31-38 ne 50-54

<sup>31</sup>Ne pa kupwa kumwendeleka, bamuvujile kivwalo, ne kumuwwika bivwalo byanji mwine, ke bamutwale ne kumutwala mu

kumupopa pa musalabu. <sup>32</sup>Kabiji byo bafuminemo, bamwene muntu mwina Kilene, jizhina janji Shimona; ne kumukakachizha bamukakachizhe’mba, Tuye nobe, usende musalabu



wanji.<sup>33</sup>Kabiji pa kufika kuntu ko batela'mba, Ngolongota, ko kuba'mba, Kuntu kwa kiboyongo, <sup>34</sup>bamupele binyu byavwangakaná na ndulu amba, atome: kabiji pa kutompapo, ka aswile kutoma ne. <sup>35</sup>Kabiji byo bamupopele pa musalabu, bate-lenga bubale bwa kwabenayamo bivwalo byanji; <sup>36</sup>ne kwikala bai-kele konka na kumutala. <sup>37</sup>Kabiji babikile peulu ya mutwe wanji kishinawino kyanji kyanembelwe'mba, UNO YE YESU MFUMU WA BAYUDEA. <sup>38</sup>Ke-po bapopeleko pa misalabu pa-mo nanji batupondo babiji ba-pukúla bintu, umo ku kilujo, mukwabo ku kipiko.

<sup>50</sup>Kabiji Yesu wabijikile jibiji

na jiwi jikatampe ne kuleka wa-lekele mweo wanji. <sup>51</sup>Kabiji po-nkapo, kipembe kya mu nzubo yazhilá ya Lesa kyatabukile ke bibiji, kufuma peulu ne kufika pansi; ne mushiji watenkene, ne mabwe nao alajikile; <sup>52</sup>ne bi-lende nabyo byasabikile; kabiji mibiji yavulá ya bazhijikwá ba-ponené kala mu tulo, nayo ya-sangwilwe; <sup>53</sup>ke balupuke mu bi-lende, byo asangukile Yesu, ba-twelele mu muzhi wazhilá ne kumweka ku bantu bavulá. <sup>54</sup>Kabiji mukulumpe wa bashilikale, ne abo bo ajinga nabo na kumutala Yesu, pa kwikimona kitentanshi, ne bintu byaubilwé, ke moyo mukatampe, amba, Kine uno waji Mwana Lesa.

## YE ÑANYI?

1. Bamukakachizhe ñanyi muntu kusenda musalabu wa Yesu? \_\_\_\_\_
2. Bapopeleko bañanyi pa misalabu pamo nanji Yesu, umo ku kilujo, mukwabo ku kipiko? \_\_\_\_\_
3. Mukulumpe wa bashilikale ne abo bo ajinga nabo sa bamutala Yesu, pa kwikimona kitentanshi ne bintu byaabilwe, baambile'mba Yesu ye ñanyi? \_\_\_\_\_

## KIBABA 22. BYO BAMUBIKILE YESU MU KILENDE



Mateo 27:57-66

<sup>57</sup>Kabiji juba, pa kufika mabanga, kwaishile munonshi mwina Alimatea, jizhina janji Yosefwa, ne aye wajinga mwana wa bwanga wa Yesu: <sup>58</sup>aye wakamulombele Pilato mubiji wa Yesu; Pilato kepo akambizhe'mba, Bamupe. <sup>59</sup>Kabiji Yosefwa wasendele mubiji, wamupombele mu kisapi

kyatoká kya linenyi, <sup>60</sup>ne kumubika monka mu kilende kyanji mwine kya katataka, kyo asongele mu jibwe: ne aye waalumwijileko jibwe jikatampe ku kibelo kya kilende, kaye. <sup>61</sup>Kabiji Maliya wa ku Mangadala wajinga konka, ne Maliyatu mukwabo, baikajile kasa batalañana na kilende.

<sup>62</sup>Kabiji kesha, jo juba ja kumlondakana na ja Kunenezhezha jimo bya kijilo, bañanga bakatampe ne Bafaliseo bapwijiile kwi Pilato, amba, <sup>63</sup>Mwane, twavuluka byo aambile awa mujimbijimbi byo akijinga mumi, amba, Pa kupidapo moba asatu nkasanguka. <sup>64</sup>Onkao mambo mukambizhe'mba, Kilende bekilame bulongo poso jikafike juba ja busatu, kuchina'mba, bana banji ba bwanga bakamwangatamo, ne kwibabu-

la bantu amba, Wasanguka mu bafu: byonkabyo bujimbijimbi bwapeláko bukakila butanshi. <sup>65</sup>Pilato wibambile’mba, Bakalama muji nabo: yainga, ne kwi-

kilamisha byonka byo mwayuka kuba. <sup>66</sup>Kabiji ke baye ne kuya, balamishishe kilende, ne kubikako katetesho ku jibwe, bakalama sa baji konka.

## YOSEFWA WAMUTEMENWE KILISHITU

Yosefwa, munonshi, wamutemenwe Yesu ne kusaka wasakile kumuzhika mu kilende kyanji mwine kya katataka. Yosefwa wafukwile kuzhikwa mwine mu ino mpunzha byo akafwa, bino pano, wasaka Nkambo yanji kwikala mu ino mpunzha yawama. Butemwe bwa kine bwa kutemwa Yesu bwabulwa kwikajila mwine. Butemwe bushilañana kyonse kimye. Butemwe bukeba mashinda a kwingijilamo. Ne anweba, mwatemwa Yesuni? Mwatana jishinda ja kumwingijilamony? Mubenakuba ka mu kumwingijila Yesuni?

## YESU WAELELE MWEKO WANJI

Yesu mwayila kyaswa muchima wanji mwine, waelele mweo wanji mu kwitupulusha anweba ne amiwa ku bubi bwetu. Kufuchila mambo kwakebele lufu lwanji ne kwichila kwa mashi anji anema. Bahebelu 9:22 witubula’mba, “...**Pabulá kwichila mashi lulekelo Iwa mambo kafwako.**” Yesu waalukile ke kitapisho kyumi kyaitabilwa, mambo kechi mwajinga bubi mwi Aye ne. Yoano 1:29 witubula’mba, “**Talai ye Mwana mukoko wa Lesa, ye ufumya bundengamambo bwa ba panopantanda!**” Kafwako muntu mukwabo nangwa umo wakonsha kufwa pa musalabu mu kufumya bubi ne, kabiji kafwako nangwa kimo nobe siliva nangwa ngolode, nangwa bañombe nangwa kintu kikwabo kyumi, kyakonsha kufumya bubi ne. Monai 1 Petelo 1:18, 19: “**Byo mwayuka’mba, Mwakujilwe ku bwikaló bwenu buncha bo mwatambwile ku bashakulu benu, kechi na bintu bibóla pamo ne siliva ne**

**ngolode ne, poso na mashi anemá, nobe a mwana mukoko wabulá bulema....”**

Tuyuke byepi amba Yesu waelele mweo wanji mwayila kyaswa muchima wanji mwine? Yoano 10:18 witubula’mba, “**Ka paji uñangataye ne, pakuba namwela ami mwine. Nji ne lusa Iwa kumwela, kabiji nji ne lusa Iwa kumutambula jibiji....**” YESU YE UJI NA BULUME BONSE. Kabiji monai ne Mateo 28:18.

Yesu byo aimene ku meso a Pilato, aye Pilato walanguluki-le’mba wajinga na luusa Iwa kupopa Yesu pa musalabu, na-nwua luusa Iwa kukasulula Yesu. Bino, monai byambo bya Yesu biji mu Yoano 19:11: “**Kumwua Yesu wamwamble’mba, Kechi uji na lusa pe amiwa ne, poso wapewalo kwiulu ....”**

Kilishitu waelele mweo wanji na mitundu yonse ya bantu, kabiji bambo bafuma mu bisaka byonse ne ba mu mitundu yonse baketabila mwi Yesu Kilishitu ne kupuluka bakapuluka. Yukai amba ne obewa ye umo wa bantu baitabila mwi NKA-MBO YESU. Tangai Lumwekesho 5:9: “**Kabiji baimba Iwimbo mupya amba, Anweba yenu mwafwainwa kutambula buku, ne kushinkula tutetesho tujípo: mambo anweba mwaipayilwe, kabiji mwamupotejile Lesa na mashi enu bantu ba mu bisaka byonse, ne ba mu njimi yonse, ne ba mu mitundu yonse, ne ba mu mikoka yonse.”**

## BALWANYI BA KWA YESU BAESEKA KUMULAMA MU KILENDE

Bañanga bakatampe ne Bafaliseo, balwanyi ba kwa Yesu, basakile kuyuka kya kine amba kilende kyashinkika bulongo mu kuba’mba kafwako nangwa umo wakonsha kwiba mubiji wa Yesu ne. Kino kilengela lusanguko Iwa Yesu kumweka kyakila mu kukumya, mambo twayuka namba kechi kyakonshekele bantu kwiba mubiji wanji ne. Bashilikale babikilwe ku kilende mu kwikila-ma bulongo. Mu Kibaba 23 tukamona kyakukumya kyamwekele!

## MABOKO AJI NA BUTATAJI

“Kana mambo ka kyo kyawamina kusekelela na mambo a Kalvali?” Muntu umo wangipwizhe jino jipuzho byo alangulu-kile’mba kyatama kusekelela na mambo a musalabu wa Yesu. Waambile’mba, “Langulukai na mambo a kupopwa pa musalabu kwa bena Loma. Mu lufu lonse lo akonsha kufwa muntu, luno lwakila mu kutama. Musalabu waajilwe pansi, kabiji bamubikile muntu ponka, ne kupopa bapopele misomali ikatampe mu maboko ne maulu kuchina’mba wakeya kufumapo. Ne musalabu waimikilwe ne kuzhikwa mu kimbo. Ne yewa muntu bamulekejile ponka pa musalabu kufikizha ne kimye kya kufwa kwanji. O ene mambo bena Kilishitu basekelela na mambo a Kijilo kya Nkambo.” Uno muntu walangu-lukile’mba kechi kintu kyawama kya kusekelelamo ne.

Bino amiwa naambile mulunda nami amba, “Mubenakulanguluka pa byamwekele kwa kubula kumvwisha mo byaime-na ne. Kechi mubenakwibinungakanya pamo na yewa wafwile ne. Lekai nemubulepo kintu kicheche kyo naumvwinepo jimo.”

Kwajinga mwanamukazhi walamba, bino maboko anji ajinga na butataji bulengesha moyo. Byo papichile myaka yavula mwananji wakuminyenga bingi kyalengeshe maboko a inanji kwikalala na butataji kya kuba’mba kechi wakonsha kutalako ne, kanatu na milanguluko ya kutalako bibi.

Juba jimo waambile kwi inanji amba, “Mama, natemwa kutala kilungi kyenu ne meso ne nsuki. Byonse byawamisha, bino maboko enu kechi amweka bulongo ne. Atama; kechi na-konsha kwiatala ne. Kana mambo ka o atamina na butataji?”

Inanji waambile’mba, “Umvwa kwi amiwa mwanami, kabiji nsakukubula na mambo a maboko ami. Nalangulukilenga namba kechi nkakubula ne, pano kyawama kukubula mu kuba’mba uyuke. Papita ke myaka jikumi pano wakijinga mwa-na mucheche nobe bañondo basatu, najinga na byavula bya

kuba lukelo lumo. Nakwamishe ne kukubika kwa bunke bobe mu kamwanya kobe'mba ulale. Nabwelele mo ntekela mu kupwisha mwingilo wami saka nashinkula matwi ami na kuteleka ku kujila kobe. Naingijilenga kya kine.

Pa kupita kimye naumvwine mawi a balunda netu saka babenakunyemena ku nzubo yetu ne kujila bajijile'mba muji mujilo. Nanyemene kufuma mo ntekela amba mfike ku kibamba kyobe. Namwene kibelo saka kibenakutema kya kine na mujilo. Nakwachile kisapi ne kwivwetakyo ku bipuzhi ne ku mutwe ne kunyemena konka ku jilungwila ja mujilo jajinga konka ku kibelo amba nkonshe kukupulusha. Nashinkwile kibelo ne kukukwata saka nakupomba ne myembu. Nanyemene kufuma mu nzubo. Mutwe wami, kilungi ne bipuzhi byami byonse byajingatu bulongo mambo a kisapi, bino maboko ami apile kya kine. Jino jo jashi na mambo a maboko ami, kabiji kyo kyalengela'mba maboko ami atame."

Pano pa kumvwa bino bintu, uno mwana waubile ka? Wakkachile maboko atama a inanji na minwe yanji yawama ne kwiafyompa na mivumbo yanji. Ne kutala mu meso a inanji ke ambe'mba, "Mama! Natemwa kulamba kwa kilungi kyenu, meso ne nshingo ne nsuki yenu, bino maboko enu, neatemwisha kukila." Onkao mambo twafwainwa kulanguluka pa mambu a lufu lwa Yesu, ne na lufu lwanji lwa pa Kalvali.

(Byafuma ku Presbyterian Banner)

## BYO TWAFWAINWA KUBA

1. Twafwainwa kwisolola mambo etu kwi Kilishitu mu kuba'mba tutambule lulekelo lwa mambo (1 Yoano 1:9).
2. Twafwainwa kwitabila mwi Yesu Kilishitu amba tupuluke (Byubilo 16:31).
3. Twafwainwa kutemwa Lesa na muchima yense ne mweo yense ne mana onse (Mateo 22:37).

4. Twafwainwa kumwitaba Kilishitu, Mwana Lesa, ku meso a bantu (Mateo 10:32).

5. Twafwainwa kwikaló bwikaló bwa kutokesha Lesa pa muchima (1 Tesalonika 4:1).

## KIBABA 23. YESU WASANGUKA MU BAFU



Mateo 28:1-10

<sup>1</sup>Kabiji ja Sabado pa kupita ke buye na kukya mu juba jitanshi ja mulungu, baishile ba Maliya wa ku Mangadala ne Maliyat mukwabo mu kumona kilende. <sup>2</sup>Kabiji ponkapo, kwajingga kitentanshi kikatampe; mambó malaika wa Nkambo wai-kijile mwiulu kwiya kwalumunako jibwe, waikele ponka pa jibwe. <sup>3</sup>Wamwekelenga no kubesha kwa mvula, kabiji kivvalo kyanji kyajinga to pamo no si-

nó: <sup>4</sup>kabiji na mambó a kumuchina bakalama bazakaminenga, ne kwaluka baalukile pamo nobe bafwá. <sup>5</sup>Kumvwa malaika wibambilé banabakazhi amba, Kange mube moyo ne; mambó nayuka namba, mumukeba Yesu, ye bapopele pa musalabu. <sup>6</sup>Ka aji muno ne; mambó wasanguka, monka mo aambile. Iyai, mumone po alajilenga Nkambo. <sup>7</sup>Kabiji yainga lubilo, kebabulai bana banji ba bwanga'mba, Wasanguka mu bafu; kabiji umvvai, watangilako ku Ngaililea; konkakwa mukamumona; umvvai, byo nemubula. <sup>8</sup>Kabiji bafumineko bukiji ku kilende, kabiji baginga na moyo, ne lusekelo lukatampe pamo; bayile lubillo mu kwibabula bana banji ba bwanga. <sup>9</sup>Kabiji ponkapo, Yesu wibasambakene'mba, Mutende! Kabiji baishile ne kumukwata ku maulu, ne kumupopwela bamupopwejile. <sup>10</sup>Kepo Yesu wibambilé'mba, Kange mube moyo ne: yainga kebabulai balongo bami bayenga ku Ngaililea, ko ko bakantana.

## BYA KUBA

Pa kupwisha kutanga Kibaba 23, nembai mikumbu yafwain-wa mu byalondelapo.

1. Malaika wa Nkambo waikijile mwiulu kwiya kwalumu-nako \_\_\_\_\_. Kiwalo kyanji kyajinga to pamo no \_\_\_\_\_.
2. Bakalama baubile bingi moyo; bazakaminenga ne kwaluka baalukile pamo nobe \_\_\_\_\_.

KILISHITU WASHINJILE lufu ne Ngehena ne kilende amba ne atweba twikale na bumi bupya. Waamba mu Yoano 14:19 amba, “...**Byo naikala na bumi amiwa, ne anweba nenu-wa mukekalanga nabo.**” Waamba mu Yoano 11:25, 26 amba, “...**Amiwa yami lusanguko ne bumi: awa wangitabilá amiwa, nangwa afwe; ukamona bumi; ne bonse bají na bumi ne kungitabila amiwa kechi bakafwe myaka yonse nangwa pacheche ne....**”

## KIBABA 24. BYAMBO BYAPELAKO BYA YESU



Mateo 28:16-20

<sup>16</sup>Pakuba bana banji ba bwanga jikumi na umo, bayile ku

Ngalilea, konka ku mutumba ye ebalayile Yesu. <sup>17</sup>Kabiji pa kumumona, bamupopwejilenga. Pakuba bamo bazzhinaukilenga. <sup>18</sup>Kabiji Yesu waishile ko bají ne kwibambila’mba, Lüsa lonse napewalo ne lwa mwiulu ne lwa pano pansi. <sup>19</sup>Onka mambo yainga na kwibasambisha ba mu mikoka yonse ya bantu baluke ke bana ba bwanga, ne kwibabatiza mu jizhina ja Tata ne ja Mwana ne ja Mupashi Wazihilá: <sup>20</sup>ne kwibafunjisha balamenga byonse byo nemukambizhe: kabiji talai, amiwa nji nenu moba onse, ne kufika ku juba jikapeláko.

Mulunda netu byo abenakufwa, twasaka kuba byonse byo asaka. Byambo byanji byapelako byaikala mu milanguluko yetu, kabiji twayuka namba aby aya byaambile muntu uji pepi na lufu saka akyangye kwitusha, byanema bingi. Byambo bimo byapelako bya Yesu, Mupulushi wetu, saka akyangye kukanjila mwiulu ne, byo bino: “...**Yainga panopantanda ponse, mukasapwile mambo awamá ku bilengwa byonse**” (Mako 16:15).

Ne anweba mubenakwingila bulongo mu kufikizha bino byambonyi?

## KYANEMENA KA KWIBABULA BAKWABO?

Byubilo 4:12 waamba’mba, “**Kabiji lupulukilo kechi luji mu mukwabo nangwa umo ne: pakuba kechi paji jizhinna jikwabo muno munshi, japewá mu bantu, jo twafwainwa kupulukilamo ne.**” Bino bitumwesha’mba YESU ye LUKETEKELO lumo lonka lwa kutambula bumi bupya!

Yoano 14:6 waamba’mba, “**Kumvwa Yesu wamwambile’-mba, Amiwa ne jishinda, ne bukine, ne bumi: ka paji wiya kwi Batata ne, poso pe amiwa.**” Pano twamona’mba YESU jo JISHINDA jimotu ja kwiya kwi Lesa Tata.

## KIPIMO KYA KUYUKA AWA ULONDELA KILISHITU KYA KINE

Yesu waamba’mba, “**Inge mwantemwa, mukalama mikambizho yami,**” (Yoano 14:15). Mukambizho mutanshi mutampe watanwa mu Mateo 22:37. Utongola byo twafwainwa kwikalala ne Lesa. Ye uno: “**Ukamutemwa Nkambo Lesa wobe na muchima wobe yense, ne na mweo wobe yense, ne na mana obe onse.**” Mukambizho wa bubiji utongola byo twafwainwa kwikalala ne bantu bonse. “...**Ukatemwa mukwenu pamo byonka byo witemwa obe mwine.** (Mateo 22:39). **Pa yo yino mikambizho ibiji po pa kishina kya mu buku yense wa Mizophilo, ne wa Bangauzhi ba Lesa**” (Mateo 22:40).

## KIBABA 25. YESU UKABWELA JIBIJI

### BIYUKILO BYA KWIYA KWANJI BYO BI KA?

Tangai chapita 24 wa Mateo mu kumona kipikichala kya biyukilo bya kubwela kwa Kilishitu. Bimo byatongolwa byo bino:

1. Bakilishitu bavula ba bubela bakeya ne kwamba'mba, Amiwa yami Kilishitu, kabiji bakajimbaika bantu bavula. Kechi twafwainwa kwibalondela ne (vs 5, 23, 24 ne 25).
2. Tukomvwa makondo ne nkuwa ya makondo. Mukoka ukemana mukoka mukwabo, ne bufumu bukemana bufumu bukwabo (vs 6, 7).
3. Kukekala bipowe bya nzala ne bitentansi ne kuku ne kuku (vs 7, 8).
4. Bena Kilishitu bakebafikizha mu malwa ne kwibepaya; kabiji bakebashikwa ku mikoka yonse ya bantu pa jizhina ja Kilishitu (vs 9). Kilishitu waishile panopantanda mu kwitumanamina amba ne atweba tukekale na bumi bwa myaka, kabiji, pano, twakonsha kumwesha butemwe bwa kutemwa Yesu monka mu kumanama mambo a jizhina janji.
5. Nangwa byonkabyo, bena Kilishitu bavula baketuntula ne kuleka kulondela Kilishitu. Bakesolola bene na bene, ne kwishikwa bene na bene (vs 10).
6. Kabiji bangauzhi ba bubela bavula bakeya, ne kwibatwala mungi bavula. Bakamwesha biyukilo bikatampe ne bya kukumya mu kwabajimbaika bena Kilishitu nangwa bano bena Kilishitu bakosa bingi (vs 11, 24).
7. Kukekala ne kuja ne kutoma ne masongola ne kupana

mu masongola byonka byo kyajinga mu moba a Nowa (vs 37-39).

8. Kabiji ponka pa kupwa malwa a aa moba, juba jikaluka ke bwi, ne ñondo naye kechi akobe mwezhi ne, ne tubangabanga nato tukapona mwiulu, ne bya bulume bya mwiulu nabyo bikatenkena (vs 29).

### YESU UKEYA BYEPI?

1. Kwiya kwanji kukekala kwakubazhimukilatu. Mateo 24:27 waamba’mba, “**Mambo byonka byuba kubesha kwa mvula kufuma ku musela ne kumweka ku muzhika; byo kikekala ne pa kwiya Mwana muntu.**”

2. Ukeya mu makumbi a mwiulu na bulume ne lukumo lukatampe (Mateo 24:30).

3. “... **Meso onse akamumona ...**” (Lumwedesho 1:7).

4. “**Mambo Nkambo mwine ukekila mwiulu na mbila, na jiwi ja malaika mwine mukatampe, ne na ntolompi ta ya Lesa: ne bafu ba mwi Kilishitu bakasanguka patanshi; ponkapo ne atweba tukatánwa bomi, tukashikulwa nabo pamo mu makumbi, mu kusambakana nanji Nkambo mwiulu: byonkabyo tukekala ne Nkambo myaka ne myaka. Onkao mambo ikoseshai anwe bene na bene na bino byambo**” (1 Tesalonika 4:16-18).


5. “... **Uno Yesu, watambwilwá mwiulu kufuma kwi anweba, ukeya pamo byonkabi byo mwamumona kasa aya mwiulu**” (Byubilo 1:11).

### MWA KWIKAJILA WANENGEZHEZHA JIMO KWIYA KWA YESU

“**Pakuba umvwe twenda mu kyeya, pamo byonka byo aji mu kyeya aye mwine, twaikala na lumvwañano lumo, atwe bene na bene, ne mashi a Yesu Mwananji etutoke-sha ku bundengamambo bonse**” (1 Yoano 1:7).

MWASAKA KUYA MWIULUNYI?

Pentai jishinda jikatwala uno mwana mwiulu.



Yoano 14:6


Masalamo 86:5 — “Mambo anweba Nkambo, mwi wawamá, mwaswila jimo kulekela mambo, kabiji mwi wa lusa Iwavujishá ku bonse bemwitá.”

Yoano 14:6 — Yesu wamwambijile Tomase amba, “Amiwa ne jishinda, ne bukine, ne bumi: ka paji wiya kwi Batata ne, poso pe amiwa.”

### MWA KUFIKILA MWIULU?

### NTAMPULO 1 — IKALA NA BULANDA NA MAMBO A BUBI BOBE

Kishimpi kya Bakaonde kyaamba’mba “Naja nyenye, kechi nkabwezha po jibiji ne.”



Satana wingijisha byubilo byatama amba ebakase bantu mu bubi.

Witukasa'mba kechi twakonsha kwikasulula atwe bene ne. lyai na minyololo yenu kwi **Yesu**. Ye wakonsha kwimuka-sulula.

## **NTAMPULO 2 — LAPILA NE KWISOLOLA MAMBO OBE KWI LESA**

**1 Yoano 1:9 – “Umvwe twisolola mambo etu, aye ye wa kishinka ne koloka mu kwitulekela mambo etu, ne kwitutokesha ku bumbulwakoloka bonse.”**

## **UBULE YESU BYONSE — AYE UKOMVWA MILOMBELO YOBE**

Londela madots mu kuyuka ñanyi wakonsha kuchimuna  
minyololo ya bubi?



### **NTAMPULO 3 — ITABILA MWI YESU NE KUMU-TAMBULA MU MUCHIMA WOBE NE MU MWEO WOBE.**

Shinkula kibelo kya mu muchima ne kumuswisha Yesu  
kutwela mu muchima wobe ponka pano!!

Lumwekesho 3:20 – “**Tala, naimana ku kibelo kasa nkokaule: umvwe muntu waumvwa jiwi jami ne kunshinkwilako, amiwa nkatwela mo aji....**”

Twakonsha kuyukisha kya kine amba twi ba kwanji byo  
tulapila kya kine ne kwitabila.

Loma 8:16 – “**Aye Mupashi mwine ushimuna pamo ne  
mipashi yetu, amba twi bana ba Lesa....**”

**Ne obewa, WAITABILA mwi Nkambo Yesu Kilishitu ke  
Mupulushi wobenyi?**

#### **KUKOKELA BYAMBO BYA LESA**

- 1. Byo** twalapila ne kwisolola bubi bwetu, kabiji
- 2. Byo** twaitabila mwi Nkambo Yesu Kilishitu ke **Mupulushi wetu**,
- 3. Pano, kitufwainwa kukokela Byambo bya Lesa.**

Twafwainwa kutwajijila kwenda mu kyeya ne kulondela Yesu  
mu bwikalo bwetu bwa **pa juba pa juba**. Tangai 1 Yoano 1:7.

## **NTAMPULO 4 — TWAJIJILA KWIKALA BWIKALO BWA LUKOKELO PA JUBA PA JUBA.**

Yoano 8:31, 32 "...Inge mukelwe monka mu mambo ami, abya kine mwi bana bami ba bwanga; ne anweba mukebuyuka bukine, ne abo bukine bukemukasulula ke bana ba bene."

### **KULOMBA KWI LESA PA JUBA PA JUBA KUKAKUKOSESCHA**

**BYA KUBA**

Pentai maboko abenakulomba mu kumwesha byo twafwa-inwa kuba inge twasaka kukoma mu bwina Kilishitu bwetu.



# **TANGA BYAMBO BYA LESA PA JUBA PA JUBA**

Fya byambo bya Lesa mu muchima wobe. Labijila maveleshi avula.

## **NE OBEWA WATAMBULA YESU KE MUPULUSHI WOBENYI?**

Umvwe wikyubile, nemba jizhina jobe monka mu uno muchima.



**UBULE BANTU BAKWABO MAMBO A YESU NE BYO  
AKUBILA.**

# *BINTU BYO TWAFWAINWA KUYUKA*

## **LESA WALENGELE NTANDA YETU**



Ntendekelo 1:1-25

**1**Mu ntendekelo Lesa walengele bya mwiulu ne ntanda. **2**Bi-no ntanda yajinga yavulañanta yatutu; kabiji ponse ponse pa kalunga ka mema pakumbene mfishi; kabiji Mupashi wa Lesa wabakaminenga peulu ya mema. **3**Ponkapo Lesa waambile’mba: Kwikale kyeya, ne kyeya kymwekele. **4**Kabiji Lesa wikimwene akya kyeya’mba: Kyawama; kabiji aye waabenye kyeya ne mfishi. **5**Ponkapo aye watelele kyeya’mba: Mute; ne mfishi wii-telele’mba: Bufuku. Byonkabyo kwajinga mute ne bufuku, ajo jo juba jitansi. **6**Kabiji Lesa waambile’mba: Pekale mpunzha pakachi ka mema, yabanye me-

ma ke pabiji. **7**Byonkabyo aye walengele mpunzha ne kwabanya waabenye mema amba amo ekale munshi ya mpunzha ne akwabo nao ekale peulu ya mpunzha, ne kumweka kymwekele byonkabyo. **8**Kabiji Lesa wiitelele mpunzha’mba: Jiulu. Byonkabyo kwajinga mute ne bufuku, ajo jo juba ja bubiji. **9**Ponkapo Lesa waambile’mba: Mema ají munshi ya jiulu efungile kuntu kumo amba mushiji waumá amweke; ne kumweka kymwekele byonkabyo. **10**Kabiji watelele apa paumá amba: Ntanda, ne akwa kwifungilá mema wateleleko’mba: Tulunga twa mema. Kabiji wibimwene’mba: Byawama. **11**Kabiji Lesa waambile’mba: Mushiji ameneshe bintu, yo nsono yúba nkunwa, ne bichi bipángwa bipangwa bijí na nkunwa, byonse monka mwayila mitundu yabyo; ne kumweka byamwekele byonkabyo; **12**mushiji wameneshe bintu, yo nsono yúba nkunwa, monka mwayila mitundu yayo, ne bichi bipángwa bipangwa bijí na nkunwa yabyo, monka mwayila mitundu yabyo. Kabiji Lesa wibimwene’mba: Byawama. **13**Byonkabyo kwaji-

nga mute ne bufuku, ajo jo juba ja busatu. <sup>14</sup>Kabiji Lesa waambile’mba: Mwikale byeya mu mpunzha ya mwiulu bya kwa-banya mute ne bufuku amba bi-kale ke biyukilo bya kuyukilako bimye byatongolwá, ne moba, ne myaka. <sup>15</sup>Kabiji amba: Bikale ke byeya mu mpunzha ya mwiulu amba bipanenga kyeya pano pa ntanda; ne kumweka kya-mwekele byonkabyo. <sup>16</sup>Kabiji Lesa walengele byeya bibiji bikatampe; akya kyabayá, ke kya kulama kimye kya mute, ne kyo-kyaya kyakepá, ke kya kulama ki-mye kya bufuku. Kabiji walengele ne tubangabanga nato. <sup>17</sup>Kabiji Lesa wibibikile byonse mu mpunzha ya mwiulu amba bipanenga kyeya pano pa ntanda, <sup>18</sup>mu kulama kimye kya mute ne kimye kya bufuku, ne mu kwabanya kyeya na mfishi; kabiji Lesa wibimwene’mba: Byawama. <sup>19</sup>Byonkabyo kwajinga mute ne bufuku, ajo jo juba ja buna. <sup>20</sup>Kabiji Lesa waambile’mba: Mu mema mwikale bisamba ne bisamba bya bintu byumi ne bañonyi nabo bapitañane-nega peulu ya ntanda mu mpunzha ya mwiulu. <sup>21</sup>Kabiji Lesa walengele bilengwa byumi bikata-mpe bya mu kalunga ka mema, ne byonsetu byumi byénda bisa-mba bisamba mu mema, monka

mwayila mitundu yabyo, ne bañonyi bonse, monka mwayila mitundu yabo. Kabiji Lesa wibimwene’mba: Byawama. <sup>22</sup>Pon-kapo Lesa wibipesheshe ne kwa-mba’mba: Semainga ne kuse-mununa, muvule ne kukumba-na monse mu mema ají mu tulunga, ne bañonyi nabo bavule pano pa ntanda. <sup>23</sup>Byonkabyo kwajinga mute ne bufuku, ajo jo juba ja butanu. <sup>24</sup>Kabiji Lesa waambile’mba: Pano pa ntanda pekale bilengwa byumi monka mwayila mitundu yabyo, banyama ba kulela ne banyama ba mungye, monka mwayila mi-tundu yabo, ne bikalába pansi nabyo monka mwayila mitundu yabyo; ne kumweka byamweke-le byonkabyo. <sup>25</sup>Byonkabyo Lesa walengele banyama ba mungye monka mwayila mitundu yabo, ne banyama ba kulela nabo mwayila mitundu yabo, ne bintu byonse bikalába pansi nabyo monka mwayila mitundu yabyo. Kabiji Lesa wibimwene’mba: Byawama.



# LESA WALENGELE MUNTU

Ntendekelo 1:26-31

**26Ponkapo Lesa waambile’mba:** Tulenge bantu mu kipasha kyetu, betupashe; bekale na bunkambo bwa pa masabi a mu mema, ne bwa pa bañonyi bapíta mwiulu, ne bwa pa banyama, ne bwa pano pa ntanda ponsetu, ne bwa pa byonsetu byénda pano pansi. **27Byonkabyo Lesa walengele** bantu mu kipasha kyanji, monka mu kipasha kyanji mwinne mo mo ebalengejile. Wibalengele mwanamulume ne mwanamukazhi. **28Kabiji Lesa wibapesheshe** ne kwibambil’mba: Semainga ne kusemununa, muvule ne kukumbana ponse pa ntanda ne kwiikokesha; mwikale na bunkambo bwa pa masabi a mu mema, ne bwa pa bañonyi bapíta mwiulu, ne bwa pa byumi byonsetu byénda pano pa ntanda. **29Kabiji Lesa wibambijile’mba:** Umvwai, nemupa nsono yonse yúba nkunwa ijí pano pa ntanda ponse, ne bichi byonse bipánga bipangwa bijí na nkunwa yabyo; bino bikekala

ke kajo kenu. **30Kabiji** ne ku banyama bonsetu bají pano pa ntanda, ne ku bañonyi bonsetu bapíta mwiulu, ne ku byonsetu byénda pano pa ntanda, byo byonse bijí na bumi, napana mitundu yonse ya nsono, ikale ke kajo kabyo; ne kumweka byamwekele byonkabyo. **31Ka-**  
**biji Lesa wibimwene** byonsetu byo alengele, kabiji byonsetu byaji byawamishatu. Byonkabyo kwajinga mute ne bufuku, ajo jo juba ja butanu na jimo.



Ntendekelo 2:7

**7Kepo Yehoba Lesa abumbile** muntu na lukungu lwa pansi, kabiji wapuyile ne muya wa bumi mu myona yanji, byonkabyo ne muntu waalukile ke mumi.

## BIMO BYA KUVULUKA

Muntu wapusana na bintu byonse byumi. Kechi tuji pamo ne banyama ba mungye ne. Buku Wa Lesa witubula mu 1 Kolinda 15:39 buno bukine bukatampe: “**Nyama yonse kechi iji pamo ne: kuji imo ya bantu, imo ya banyama,**

**imo ya bañonyi, imo ya masabi.**” Mubiji wa muntu wapusana na mibiji ya bilengwa byumi bikwabo, kabiji muntu walenge-lwe na mupashi mumi. Byo twasemwa tukekala pantu pamo. Baitabila mwi Nkambo Yesu Kilishitu ke Mupulushi wabo bakekala na bumi bwa myaka, bino aba bakana kutambula Yesu mu michima yabo bakekala mu lukabisho lwa myaka ne myaka. Yoano 5:28, 29 waamba’mba, “**Kange mukumye kyo kino ne: mambo juba jibenakwiya, jo bakomvwa bonse bají mu bilende jiwi janji, kepo bakafumamo; baubilénga byawamá, ku lusanguko lwa bumi; aba baubilénga byatamá, ku lusanguko lwa kije.**”

Atweba bonse tukemana mu kije kya Kilishitu. Bahebelu 9:27 waamba’mba, “**Kabiji byonka byo ebatongwela bantu kufwa jimo jonka, kabiji palutwe ke kuya ku kije.**” Loma 14:10-12 waamba’mba, “...mambo atweba bonse tukemana ku kipona kya kije kya Lesa. Mambo kyanembwa’mba, Aye Nkambo amba, Byonka byo naikala na bumi, manungo onse akafukamina kwi amiwa, ne njimi yonse ikatotanga Lesa. Kabiji atweba bonsetu umo umo tukeambila mambo kwi Lesa.”

Ano maveleshi amwesha’mba atweba twapusana na banyama. Kya kine banyama bafwa ne kubwela ku lukungu lwa pansihi, bino Musapwishi 3:21 utongola kya kine lupusano lwa mupashi wa muntu ne mupashi wa banyama. Waamba’mba, “**Nanyi wayuka’mba mupashi wa muntu uya kwiulu kabiji ne mupashi wa nyama wikila munshi ya ntanda?**”

Onkao mambo, twamona’mba mupashi wa muntu ubwela kwi Lesa wamulengele. Musapwishi 12:7 witubula’mba: “**Kabiji ne lukungu sa lukyangye kubwelela ku mushiji ko lwa-jinga kala, ne mupashi naye sa akyangye kubwelela kwi Lesa yenka wamupaine.**”

## MUNTU WAKAJILWA MUPULUSHI

Loma 3:23 — “**Mambo bonse balenga mambo, kabiji bapelelelatu ne kufika ku lukumo lwa Lesa ne.**”

Loma 5:12 — “**Byonkabyo, bundengamambo byo bwa-**

twelele panopantanda ku muntu umo, ne lufu nalo Iwatwelele na bundengamambo, kabiji byonkabyo ne lufu Iwakumbene ku bantu bonse, mambo bonse balengele mambo.”

Yoano 3:5 — “...Inge muntu ne kusemwa ku mema ne ku Mupashi ne, kechi akonshe kutwela mu bufumu bwa Lesa ne.”

## **LESA UMWENA MUPULUSHI**

Loma 5:6-11 — “Mambo byo twakiji banekaná, mu kimye kyafwainwá Kilishitu wibafwijile babulá kwakamwa Lesa. Mambo muntu kampe kechi amufwile mololoketu ne: kana muntu wa lusa kampe umo usakuchinchika ne kumufwila. Pakuba aye Lesa witumwesha butemwe bwanji mwine bo etutemenwamo, mambo, byo twakijinga bandengamambo, Kilishitu witufwijile. Mambo pano, byo twabingishiwa na mashi anji, kine kabiji tukapulukila mwi aye ku bukaji bwa Lesa. Mambo umvwe byo twakijinga balwanyi, twapwaine ne Lesa mu lufu Iwa Mwananji, pano byo twapwana, kine kabiji tukapulukila mu bumi bwanji; namo kechi monkamtu ne, kabiji twasekela ne mwi aye Lesa monka mwi Nkambo yetu Yesu Kilishitu, mo twatambwila pano bupwanyi.”

Yoano 3:16, 17 — “Mambo Lesa byo ebatemwisha ba panopantanda, wapaine Mwananji yenkawa umo amba, bonse bamwitabilá kechi bonaike ne, poso amba bekale na bumi bwa myaka. Mambo Lesa kechi watumine Mwananji panopantanda mu kwibazhachisha ba panopantanda ne; poso amba ba panopantanda bapulukile mwi aye.”

## **TWAFWAINWA KUKETEKELA MWI KILISHITU AMBA TUPULUKE**

Yoano 3:18 — “Aye wamwitabilá kechi wazhatwa ne: pakuba awa wabulá kwitabila wazhatwa kala, mambo kechi waitabila mu jizhina ja Mwana Lesa yenkawa umo ne.”

Byubilo 16:31 — “Kumvwa abo amba, Itabilai Nkambo Yesu, musakupuluka anweba, ne ba mu nzubo yenu pamo.”

Yoano 5:24 — “Kine, kine, nemwambila namba, Aye waumvwa mambo ami, ne kumwitabila aye wantumá uji na bumi bwa myaka, kechi ukeya mu kije ne, pakuba mu lufu wafumamo, wapitaila ku bumi.”

# Mikumbu Ya Mepuzho

Mikumbu ya mepuzho onse mu uno buku "Lusekelo" Mateo atanwa munshi amba mwakonsha kukyonga mwingilo wenu ne kuyuka mikumbu yafwainwa. Kutala ku uno peji ne, kanatu mwapwisha mepuzho onse. Inge mwakankalwa asatu nangwa abiji nangwa jimo, nanchi mwaubatu bulongo.

## Peji 1, 2

- A. 1. Maliya
- 2. Mupashi Wazhila
- 3. malaika
- 4. Emanuele
- 5. Lesa tuji nanji

## Peji 5

- A. 1. Ee      3. Ine      5. Ee      7. Ee
- 2. Ee      4. Ine      6. Ee

B. Kabiji pa kutwela mu nzubo bamwene mwana sa aji ne inanji Maliya; ke bamulambil ne kumulambil panshi ne kumupopwela; ponkapo basolvle nsabo yabo ne kumupa bya bupetu bya ngolode ne libona ne mola.

## Peji 8

- A. 1. Mwiulu      3. Yesu
- 2. nzhie,      4. nkunda
- buki      5. Mwanami

## Peji 10

- A. 1. 40
- 2. Diabola      4. nzubo ya Lesa
- 3. shinkwa      5. kumupopwela

## Peji 13

- A. 1. Andeleo
- 2. Kuta bukonde mu mema
- 3. Yoano
- 4. makonde

## Peji 15, 16

A. Tata wetu wa mwiulu, Jizhina jenu jizhile. Bufumu bwenu bufike. Kyaswa muchima wenu kyubiwe pano panshi, byonka byo kyubiwa mwiulu. Mwitupeko kajo ketu ka lelo. Ne kwitulekelako mambo etu, byonka byo twibalekela betuléngela mambo. Kabiji kechi mwitutwale mu lweseko ne, mwitupokolole kwi yewa

mubi. Mambo bufumu bo bwenu ne bulume ne lukumo myaka ne myaka. Amen.

## Peji 21

- A. 1. wa mana
- 2. wabula mana

## Peji 27, 28

- A. 1. bañonyi
- 2. mushiji, yasokelwe, yaumine
- 3. miba
- 4. bi pangwa
- B. 1. byambo, bebikwatakanya
- 2. byambo, betuntula
- 3. panopantanda, byambo, kupanga
- 4. bipangwa

## Peji 37, 38

- A. 1. Kwpayañana ne.
- 2. Kuba bukende ne.
- 3. Kwiba ne.
- 4. Kwibabepela bantu ne.
- 5. Unemeke bashobe ne bainobe.
- 6. Utemwe mukwenu byonka byo witemwa obe mwine.
- B. 1. Ee      3. Ine      5. Ine
- 2. Ee      4. Ee      6. Ine

## Peji 41

- A. 1. Kyambo kimo
- 2. bingi
- 3. kaili
- 4. Balabasa
- 5. musalabu

## Peji 42

- A. 1. kyachijisha
- 2. miba, mutwe
- 3. Mfumu
- 4. bamushipile, jitete

## Peji 44

- A. 1. Shimona
- 2. batupondo babiji
- 3. Mwana Lesa

## Peji 50

- A. 1. jibwe, sino
- 2. bafwa

# BYA KUBA

Pa mepuzho alondelapo nemba “Ee” umvwe wakonsha kukumbula kya kine amba “Ee.”

\_\_\_\_\_ 1. Byo watanga uno buku “Lusekelo,” wa-umvwa’mba Lesa kasa abenakwamba ku muchima wobenyi?

\_\_\_\_\_ 2. Wakeba kwikala ke mwana wa Lesa ne kwikala na bumi bwa myakanyi?

\_\_\_\_\_ 3. Waumvwa bulanda na mambo a bubi nangwa bintu byatama byo waubilenyi? Uji na kizaku kya kine kya kuleka bubi bobenyi?

\_\_\_\_\_ 4. Walomba kala kwi Yesu ne kumubula’mba naumvwa bulanda na mambo a bubi bwaminyi?

\_\_\_\_\_ 5. Walomba kwi Yesu kanatu ne mutende wa mu muchima waiya kabiji wayuka’mba Yesu waumvwa milombelo yobe ne kukulekelako mambo obenyi? Vulu-ka’mba Yesu walaya’mba umvwe twisolola mambo etu, aye ye wakashinka ne koloka mu kwitulekela mambo etu. (Tangai 1 Yoano 1:9 uji pa peji 55 mu uno buku.)

\_\_\_\_\_ 6. Ubenakuketekela mwi Kilishitu ke Mupulushi wobenyi?

\_\_\_\_\_ 7. Mwayila bukwasho bwa Nkambo waswa kumulondela ne kulomba pa juba pa juba kwi aye amba akukwashe mu kwikala bwikal bwa kumutokesha Lesa pa muchimanyi?

\_\_\_\_\_ 8.Ukeseka kwibakwasha bakwabo kutambula Yesu ke Mupulushi wabo pamonyi?

# KILISHITU UKABWELA JIBIJI!



## IKALAI BATENGELELA JIMO

**Mateo 24:44 — “Ne anweba mwikale ba kutengelela jimo: mambo Mwana muntu ukeya mu kimye kyo mwabula kuketekela.”**

Uno buku kechi ye wa kupana ku jibumba ja bantu ne. Wafwainwa kwingijishiwa na muntu bunke bwanji, nangwa na kipanyi kicheche kya kufunda Buku Wa Lesa.

Scripture text is from the Bible in Kaonde © 1975, used by permission of United Bible Societies Africa Regional Centre, Nairobi, Kenya.

Kyo Kya Kupanatu — Kechi Kya Kupotesha ne



Read booklets online or by App  
[www.wmp-readonline.org](http://www.wmp-readonline.org)